

徐氏醫學十六種

10

10  
[E] Chinese

Vol X



洄溪醫案序

袁簡齋太史作靈胎先生傳云欲采其竒方異術以垂醫鑑而活蒼生因倉卒不可得僅載迨耕石汪令聞數條而語焉未詳余甚惜之今夏呂君慎盦以洄溪醫安鈔本一卷寄贈云得之徐氏及門金君復村者余讀之如獲鴻寶雖祕本而方藥不甚詳然其穿穴膏盲神施鬼設之伎足以垂醫鑑而活蒼生爰為編次竊附管窺用俟高明梓以傳世余殷望焉

咸豐五年歲次乙卯十月海昌後學王士雄

洄溪醫案目錄

目錄

中風

惡風

周痺

痲

傷寒

則足傷寒

外感停食

時證

遊魂

失魂

祟病

瘟疫

暑

暑邪熱呃

瘧

痢

瘧痢

畏寒

畏風

痰

痰喘

痰喘亡陰

飲癖

翻胃

呃

瘧

水腫

消

蟲痛

怔忡

亢陽

吐血

瘀留經絡

腸紅

血痢

崩

瘀血衝厥

胎中毒火

子利

試胎

產後風熱

產後血瘕

產後腸癰

惡疽

流注

腸癰

腿癰

臂疽

項疽

對口

發背

對心發

肺癰

乳癰

下疳

筋瘤

泗溪醫案

吳江徐大椿著

海昌後學王士雄編

中風

許門金姓早立門首卒遇惡風口眼喎邪不能言醫用人參桂附諸品此近日時醫治風證不祧之方也越余視之其形如尸面赤氣粗目瞪脉大處以祛風消痰清火之劑其家許以重賞留數日余曰我非行道之人可貨取也固請余曰與其誤藥以死莫若服此三劑醒而能食不服藥可也後月餘至余家拜謝問之果服三劑而起竟不敢服他藥惟腿膝未健手臂猶麻為立膏方而全愈此正內經所謂虛邪賊風也以辛熱剛燥治之固非以補陰滋膩治之亦謬治以辛涼佐以甘溫內經有明訓也

運使王公敘揆自長蘆罷官歸里每向余言手足麻木而痰多余謂公體本豐腴又善飲痰流經脉宜搏節為妙一日忽昏厥遺尿口噤手拳痰聲如鋸皆屬危證醫者進參附熟地等藥煎成未服余診其脉洪大有力面赤氣粗此乃痰火充實諸竅皆閉服參附立斃矣以小續命湯去桂附加生軍一錢為未假稱他藥納之恐旁人之疑駭也戚黨莫不詳然太夫人素信余力主服余藥三劑而有聲五劑而能言然後以消痰養血之藥調之一月後步履如初

張由巷劉松岑素好飲後結酒友數人終年聚飲余戒之不止時年纔四十除夕向店沽酒秤銀手振秤墜而身亦仆地口噤不知人急扶歸歲朝遣人邀余與以至寶丹數粒囑其勿服他藥恐醫者知其酒客又新納寵必用溫補也初五至其家竟未服藥診其脉弦滑洪大半身不遂口強流涎乃濕痰注經傳腑之證余用豁痰驅濕之品調之月餘而起一手一足不能如舊言語始終艱澀初無子病愈後連舉子女皆成立至七十三歲而卒誰謂中風之人不能永年耶凡病在經絡筋骨此為形體之病能延歲月不能

除根若求全愈過用重劑必至傷生富貴之人聞此等說不但不信且觸其怒於是詭譎之人羣進溫補無不死者終無一人悔悟也

西門外汪姓新正出門遇友於途一揖而仆口噤目閉四肢癱瘓舁歸不省人事醫亦用人參熟地等藥其母前年曾抱危疾余為之治愈故信余求救余曰此所謂虛邪賊風也以小續命湯加減醫者駭謂壯年得此必大虛之證豈可用猛劑其母排眾議而服之隔日再往手攬余衣兩足踏地欲作叩頭勢余曰欲謝余乎亟點首余止之復作垂涕感恩狀余慰之且謂其母曰風毒深入古本堅硬病雖愈言語不能驟出母驚恐而誤投溫補也果月餘而後能言百日乃痊

東山席以萬年六十餘患風痺時醫總投溫補幸不至如近日之重用參附病尚未劇余診之脈洪而氣旺此元氣強實之體而痰火充盛耳清火消痰以治標養血順氣以治本然經絡之痰無全愈之理於壽命無傷十年可延也以平淡之方隨時增損調養數載年七十餘始卒此所謂人實證實養正驅邪以調和之自可永年重藥傷正速之死耳

叔子靜素無疾一日余集親友小酌叔亦在座喫飯至第二碗僅半頭忽垂箸亦落同坐問曰醉耶不應又問骨硬耶亦不應細視之目閉而口流涎羣起扶之別座則頸已歪脈已絕痰聲起不知人矣亟取至寶丹灌之始不受再灌而嚥下少頃開目問扶者曰此何地也因告之故曰我欲歸扶之坐輿內以歸處以驅風消痰安神之品明日已能起惟軟弱無力耳以後亦不復發此總名卒中亦有食厥亦有痰厥亦有氣厥病因不同如藥不預備則一時氣不能納經絡閉塞周時而死如更以參附等藥助大助痰則無一生者及其死也則以為病本不治非溫補之誤舉世皆然也 雄按資生經云有人忽覺心腹中熱之甚或曰此中風之候與治風藥而風不作夷陵某太守夏間忽患熱甚乃以水灑地設簟臥其上令人扇

之次日忽患中風而卒人但咎其臥水簾而用扇也暨見一澧陽老婦見證與太守同因服小續命湯而愈合而觀之乃知中風由心腹中多大熱而作也徐氏之論正與此合易曰風自火出諺云熱極生風何世人之不悟耶若可用參附等藥者乃脫證治法不可誤施於閉證也

### 惡風

湖州副總戎穆公廷弼氣體極壯忽患牙緊不開不能飲食絕粒者五日矣延余治之晉接如常惟呼飢耳余啟視其齒上下止開一細縫撫其兩頰皮堅如革細審病情莫解其故因問曰此為惡風所吹公曾受惡風否曰無之既而恍然曰誠哉二十年前曾隨圍口外臥帳房中夜半怪風大作帳房拔去卒死者三人我其一也灌以熱水二人生而一人死我初醒口不能言者二日豈至今復發乎余曰然乃戲曰凡治皮之工皮堅則消之我今欲用藥消公之頰皮也乃以蜈蚣頭蝎子尾及朴硝硼砂冰麝等藥擦其內又以大黃牙皂川烏桂心等藥塗其外如有痰涎則吐出明晨余臥未起公啟戶曰真神仙也早已食粥數碗矣遂進以驅風養血膏而愈蓋邪之中人深則伏於藏府骨脈之中精氣旺則不發至血氣既衰或有所感雖數十年之久亦有復發者不論內外之證盡然亦所當知也 雄按皮膚頑痺非外治不為功此因其堅如革故多用毒烈之品也

### 周痺

烏程王姓患周痺證偏身疼痛四肢癱瘓日夕叫號飲食大減自問必死欲就余一決家人垂淚送至舟中余視之曰此歷節也病在筋節非煎丸所能愈須用外治乃遵古法敷之搨之蒸之熏之旬日而疼痛稍減手足可動乃遣歸月餘而病愈大凡榮衛藏府之病服藥可至病所經絡筋節俱屬有形煎丸之力如太輕則不能攻邪太重則恐傷其正必用氣厚力重之藥敷搨薰蒸之法深入病所提邪外出古人所

以獨重鍼灸之法。醫者不知。先服風藥不驗。即用溫補。使邪氣久留。即不死。亦為廢人。在在皆然。豈不冤哉。雄按風藥耗榮液。溫補實隨絡。皆能助邪。並痛若輕。淡清通之劑。正宜頻服。不可徒恃外治也。

痺

新郭沈又高續娶少艾。未免不節。忽患氣喘。厥逆。語澀。神昏。手足不舉。醫者以中風法治之。病益甚。余診之曰。此內經所謂痺證也。少陰虛而精氣不續。與大概偏中風中風痰厥風厥等病絕不相類。劉河間所立地黃飲子。正為此而設。何醫者反忌之耶。一劑而喘逆定。神氣清。聲音出。四肢展動。三劑而病除。八劑調以養精益氣之品而愈。余所見類中而宜溫補者。止此一人。識之以見余並非禁用補藥。但必對證乃可施治耳。雄按古云真中屬實。類中多虛。其實不然。若其人素稟陽盛。過啖肥甘。積熱釀痰。壅塞隨絡。多患類中。治宜化痰清熱。流利機關。自始至終。忌投補滯。徐氏謂宜於溫補者。不多見。洵閱歷之言也。

傷寒

蘇州柴行倪姓。傷寒失下。昏不知人。氣喘舌焦。已辨後事矣。余時欲往揚州。泊舟桐涇橋河內。適當其門。晚欲登舟。其子哀泣求治。余曰。此乃大承氣湯證也。不必加減。書方與之。戒之曰。一劑不下。則更服。下即止。遂至揚。月餘而返。其人已強健如故矣。古方之神效如此。凡古方與病及證俱對者。不必加減。若病同而證稍有異。則隨證加減。其理甚明。而人不能用。若不當下者。反下之。遂成結胸。以致聞者。遂以下為戒。顛倒若此。總由不肯以仲景傷寒論潛心體認耳。

則足傷寒

嘉善黃姓。外感而兼鬱熱。亂投藥石。繼用補劑。邪留經絡。無從而出。下注於足。兩脛紅腫。火痛。氣逆衝心。呼號不寐。余曰。此所謂則足傷寒也。足將落矣。急用外治之法。薰之。蒸之。以提毒散瘀。又用丸散內消其



痰火并化其毒涎從大便出而以辛涼之煎劑託其未透之邪三日而安大凡風寒留於經絡無從發洩往往變為癰腫上為發頤中為肺癰肝癰痞積下為腸癰便毒外則散為斑疹瘡瘍留於關節則為痿痺拘攣注於足脛則為臍足矣此等證俱載於內經諸書自內外科各分一門此等證遂無人知之矣

### 外感停食

淮安大商楊秀倫年七十四外感停食醫者以年高素封非補不納遂致聞飯氣則嘔見人飲食輒叱曰此等與物虧汝等如何喫下不食不寢者匝月惟以參湯續命而已慕名來聘余診之曰此病可治但我所立方必不服不服則必死若徇君等意以立方亦死不如竟不立也群問當用何藥余曰非生大黃不可眾果大駭有一人曰姑俟先生定方再商其意蓋謂千里而至不可不周全情面俟藥成而私棄之可也余覺其意煎成親至病人所強服旁人皆惶恐無措止服其半是夜即氣平得寢並不瀉明日全服一劑下宿垢少許身益和第三日侵晨余臥書室中未起聞外詳傳曰老太爺在堂中埽地余披衣起詢告者曰老太爺久臥思起欲親來謝先生出堂中因果殼盈積乃自用帚掠開以便步履旋入余臥所久談早膳至病者觀食自向碗內撮數粒嚼之且曰何以不臭從此飲食漸進精神如舊群以為奇余曰傷食惡食人所共知去宿食則食自進老少同法今之醫者以老人停食不可消止宜補中氣以待其自消此等亂道世反奉為金鍼誤人不知其幾也余之得有聲淮揚者以此

### 時證

西塘倪福徵患時證神昏脈數不食不寢醫者謂其虛投以六味等藥此方乃浙中醫家不論何病必用之方也遂粒米不得下咽而煩熱益甚諸人束手余診之曰熱邪留於胃也凡外感之邪久必歸陽明邪重而有食則結成燥矢三承氣主之邪輕而無食則凝為熱痰三瀉心湯主之乃以瀉心湯加減及消痰

開胃之藥兩劑而安諸人以為神奇不知此乃淺近之理傷寒論具在細讀自明也若更誤治則無生理矣  
雄按韓堯年年甫踰冠體素豐而善飲春間偶患血溢廣服六味等藥初夏患身熱痞脹醫投瀉心陷胸等藥遂脹及少腹且拒按大便秘流小溲不行煩熱益甚湯飲不能下嘔譫語唇焦改用承氣紫雪亦如水投石延余視之黃苔滿厚而不甚燥脉滑數而按之虛軟不過濕熱阻氣升降不調耳以枳桔湯加白前紫苑射干馬兜鈴杏仁厚朴黃芩用蘆根湯煎一劑譫語止小溲行二劑旁流止胸漸舒三劑可進稀糜六劑胸腹皆舒粥食漸加改投清養法又旬日得解燥矢而愈諸人亦以為神奇其實不過按證設法耳  
又按今夏衣賈戴七患暑濕余以清解法治之熱退知飢家人謂其積勞多虛遽以補食啖之三日後二便皆閉四肢腫痛氣逆衝心呼號不寐又乞余往視乃餘邪得食而熾壅塞胃府府氣實則經氣亦不通而機關不利也以葶藶湯去意以加姜仁枳實梔子服于黃芩枳椇煎調元明粉外用葱白杵爛和蜜塗之小溲先通大便隨行三日而愈

### 游魂

郡中將氏子患時證身熱不涼神昏譫語脉無倫次余診之曰此游魂證也雖服藥必招其魂因訪招魂之法有鄰翁謂曰我聞度禱靈神則能自言父如其言病者果言曰我因看戲小臺倒幾被壓受驚復往城隍廟中散步魂落廟中當以肩輿撞我歸如言往招明日延余再診病者又言我魂方至房門為父親衝散今早魂臥被上又為母親疊被掉落今不知所向矣咆哮不已余慰之曰無憂也我今遠汝因用安神鎮魄之藥加豬心尖辰砂絳帛包裹懸樂壇中煎服戒曰服藥得震勿驚醒之裏寐即相合果一劑而安調理而愈問之俱不知也

### 失魂

平湖張振西壁鄰失火受驚越數日而病發無大寒熱煩悶不食昏倦不寐余視之頗作寒暄語而神不  
接余曰此失魂之證不但風寒深入而神志亦傷不能速愈亦不可用重劑以煎方祛邪以丸散安神乃  
可漸復時正歲除酌與半月之藥而歸至新正元宵始知身在臥室問問前所為俱不知也至二月身已  
健同其弟元若來謝候余山中且曰我昨晚腦後起一瘰微痛余視之驚曰此玉枕疽也大險之證此地  
之藥急同之歸外撰內託諸法並用其弟不能久留先歸明晨我子大驚呼余曰張君危矣余起視之頭  
大如斗脣厚寸餘目止細縫自頂及肩膿泡數千惟神不昏憤毒未攻心尚可施救急遣舟招其弟余先  
以護心藥灌之母令毒氣攻內乃用煎劑從內託出外用軟堅消腫解毒提膿之藥敷之一日而出毒水  
斗餘至晚腫漸消皮皴明日口舌轉動能食竟不成疽瘡口僅如錢大數日結痂其弟聞信而至已愈八  
九矣凡病有留邪而無出路必發腫毒患者甚多而醫者則鮮能治之也

揚州吳運臺夫人患消證晝夜食粥數十椀氣逆丈夫通夕不寐余診之六脉細數不倫神不清爽余曰  
此似崇脈必有他故其家未信忽一日僕婦晨起入候見牀上一女盛妝危坐以為夫人也諦視則無有  
因以告夫人曰此女常臥我牀內以此不能成寐而煩渴欲飲耳服余藥未甚效一夕夜將半病者大呼  
曰速請三舅爺來切不可啟門啟門則我魂必走出三舅爺者即其弟唐君悔生也臥室遙隔呼之不能  
聞女僕私啟門邀之魂即隨出徧歷廳堂廊廡及平昔足未經行者遇唐君趨至魂堅執其辮仍返房見  
己身臥牀上唐君撫之魂遂歸附於身問所寓耳皆不爽細攷所見之女乃運臺聘室也未成婚而卒卒  
之時囑其父母謂吳郎必顯貴我死須懸其血食我而葬我於祖墓運臺服官後未暇辦故為崇運臺謂  
余曰君言有為崇者效果驗真神人也將何以慰之余曰鬼有所歸乃不為厲公當迎柩厝墓立位而祀  
之可也運臺依余言以行然後服藥有功而病根永除矣

崇病

同里朱翁元亮僑居郡城歲初其媳往郡拜賀其舅舟過要門見城上蛇王廟俗云燒香能免生瘡腫因往謁焉歸即狂言昏冒舌動如蛇稱蛇王使二女僕一男僕來迎延余診視以至寶丹一丸遣老嫗灌之病者言此係毒藥必不可服含藥噴嫗嫗亦仆不省人事舌伸頸轉亦作蛇形另易一人灌藥訖病者言一女使被燒死矣凡鬼皆以硃砂為火也次自煎藥內用鬼箭羽病者又言一男使又被射死矣鬼以鬼箭為矢也從此漸安調以消痰安神之品月餘而愈此亦客忤之類也非金石及通靈之藥不能奏效林家巷周宅看門人之妻縊死遇救得甦余適寓周氏隨眾往看急以紫金錠搗爛水灌之而醒明日又縊亦遇救余仍以前藥灌之因詢其求死之故則曰我患心疼甚有老嫗勸我將繩繫頸則痛除矣故從之非求死也余曰此嫗今安在則曰在牀裏視之無有則曰相公來已去矣余曰此縊死鬼汝痛亦由彼作祟今後若求汝即嚼余藥噴之婦依余言嫗至曰爾口中何物欲害我耶詈罵而去其自述如此蓋紫金錠之辟邪神效若此

同學李鳴古性誠篤而能文八分書為一時冠家貧不得志遂得奇疾曰夜有人罵之聞聲而不見其形其罵語惡毒不堪遂惱恨終日不寢不食多方曉之不喻也其世叔何小山先生甚憐之同余往診李曰我無病惟有人罵我耳余曰此即病也不信小山喻之曰子之學問人品人人欽服豈有罵汝之人耶李變色泣下曰他人勸我猶可世叔亦來勸我則不情甚矣昨日在間壁罵我一日即世叔也何今日反水面諛耶小山云我昨在某處竟日安得來此且汝間壁是誰家我何從入愈辨愈疑惟垂首浩歎而已卒以憂死

瘟疫

雍正十年崑山瘟疫大行因上年海嘯近海流民數萬皆死於崑埋之城下至夏暑蒸尸氣觸之成病死  
者數千人汪翁天成亦染此證身熱神昏悶亂煩躁脈數無定余以清涼芳烈如鮮菖蒲澤蘭葉薄荷  
青蒿蘆根茅根等藥兼用辟邪解毒丸散進之漸知人事因自述其昏暈時所歷之境雖言之繁瑣終虛妄  
不足載也余始至崑時懼應酬不令人知會翁已愈余將歸矣不妨施濟語出而求治者二十七家檢其  
所服皆香燥升提之藥與證相反余仍用前法療之歸後有葉生為記姓氏愈者二十四死者止三人又  
皆為他醫所誤者因知死者皆枉凡治病不可不知運氣之轉移去歲因水濕得病濕甚之極必兼燥化  
內經言之甚明况因證用藥變化隨機豈可執定往年所治祛風逐濕之方而以治瘟邪燥火之證耶  
雄按風濕之邪一經化熱即宜清解溫升之藥咸在禁例喻氏論疫主以解毒避矣而獨表彰敗毒散  
一方不知此方雖名敗毒而群集升散之品凡溫邪燥火之證犯之即死用者審之

暑

同學趙子雲居太湖之濱患暑痢甚危留治三日而愈時值亢旱人忙而舟亦絕少余欲歸不能惟鄰家  
有一舟適有病人氣方絕欲往震澤買棺乞借一日不許有一老嫗指余曰此即治趙某病愈之人也今  
此婦少年戀生甚故氣不即斷盍求一診余許之脈絕而心尚溫皮色未變此暑邪閉塞諸數未即死也  
為處清暑通氣方病家以情不能却借舟以歸越數日子雲之子來詢之一劑而有聲二劑能轉側三劑  
起矣

余寓郡中林家巷時值盛暑侵人某之母心嘔吐厥傷其形如尸而齒噤不開已辦後事矣居停之僕總  
優求救於余余因近鄰往診以著啟其齒咬者不能出余曰此暑邪閉塞諸數耳以紫金錠二粒水磨灌  
之得下再服清暑通氣之方明日余泛舟游虎阜其室臨河一老嫗坐窗榻上彷彿病者歸訪之是夜

黃昏即能言更服煎劑而全愈此等治法極淺極易而知者絕少蓋邪逆上諸竅皆閉非芳香通靈之藥不能即令通達徒以煎劑灌之即使中病亦不能入於經竅况又誤用相反之藥豈能起死回生乎

蘆墟迂耕石暑熱壞證脈微欲絕遺尿謔語尋衣摸牀此陽越之證將大汗出而脫急以參附加童便飲之少甦而未識人也余以事任郡戒其家曰如醒而能言則來載我越三日來請亟往果生矣醫者謂前藥已效仍用前方煎成未飲余至曰陽已回火復熾陰欲竭矣附子入咽即危命以西瓜啖之病者大喜連日啖數枚更飲以清暑養胃而愈後來謝述昏迷所見有一黑人立其前欲啖之即寒冷入骨一小兒以扇驅之曰汝不怕霹靂耶黑人曰熱爾三霹靂奈我何小兒曰再加十個西瓜何如黑人惶恐而退余曰附子古名霹靂散果服三劑非西瓜則伏暑何由退其言皆有證據亦奇事也 雄按袁簡齋太史作靈胎先生傳載此案云先投一劑須臾目瞑能言再飲以湯竟躍然起故張柳吟先生以為再飲之湯當是白虎湯今原案以西瓜啖之因西瓜有天生白虎湯之名而袁氏遂下一湯字致啟後人之疑序事不可不慎此類是矣

毛履和之子介堂者病熱極大汗不止脉微肢冷面赤氣短醫者仍作熱證治余曰此即刻亡陽矣急進參附以回其陽其祖有難色余曰辱在相好故不忍坐視亦豈有不自信而嘗試之理死則願甘償命乃勉飲之一劑而汗止身温得寐更易以方不十日而起同時東山許心一之孫倫五病形無異余亦以參附進舉室皆疑駭其外舅席際飛篤信余力主用之亦一劑而復但此證乃熱病所變因熱甚汗出而陽亡苟非脈微足冷汗出舌澀則仍是熱證誤用即死死者甚多傷心慘目此等方非有實見不可試也

雄按古潤二字最宜切記

閩門內香店某姓患暑熱之證服藥既誤而樓小向西樓下又香燥之氣熏燥津液厥不知人舌焦目裂

其家去店三里欲從烈日中擡歸以待斃余曰此證固危然服藥得法或尚有生機若更暴於烈日之中必死於道矣先進以至寶丹隨以黃連香薷飲兼竹葉石膏湯加蘆根諸清涼滋潤之品徐徐灌之一夕而目亦退有聲神氣復而能轉側二日而身和能食稀粥乃歸家調養而痊 雄按此證已津液受燥舌焦目裂矣則用至寶丹不如用紫雪而香薷亦可議也

常熟席湘北患暑熱證已十餘日身如熾炭手不可近煩躁昏沈聚諸汗藥終無點汗余曰熱極津枯汗何從生處以滋潤清芳之品三劑頭先有汗漸及手臂繼及遍身而熱解蓋發汗有二法濕邪則用香燥之藥發汗即以去濕燥病則用滋潤之藥滋水即作汗其理易知而醫者茫然可慨也

洞庭後山席姓者暑邪內結厥逆如尸惟身未冷脈尚微存所謂尸厥也余謂其父曰邪氣充塞逼魂於外通其諸竅魂自返耳先以紫金錠磨服後用西瓜蘆根蘿蔔甘蔗打汁時時灌之一日兩夜納二大椀而漸甦問之則曰我坐新廟前大石上三日見某家老嫗某家童子忽聞香氣撲鼻漸知身在室中有一人臥牀上我與之相并乃能開目視物矣新廟者前山往後山必由之路果有大石詢兩家老嫗童子俱實有其事此類甚多不能盡述其理固然非好言怪也

閩門龔孝維患熱病忽手足拘攣呻吟不絕昏昏迷延余診視脈微而躁膚冷汗出陽將脫矣急處以參附方親戚滿座謂大暑之時熱病方劇力屏不用其兄素信余違眾服之身稍安明日更進一劑漸甦能言余乃處以消暑養陰之方而愈

郡中友人將英蘭氣體壯健暑月於親戚家祝壽喫湯餅過多回至閩門又觸臭穢痧暑夾食身熱悶亂延醫治之告以故勉用輕藥一劑亦未能中病也况食未消而暑未退豈能一劑而愈明日復診曰服清理而不愈則必虛矣即用參附是夕煩躁發昏四肢厥冷復延名醫治之曰此虛極矣更重用參附明日

熱冒昏厥而斃。余往唁之。傷心慘目。因念如此死者遍地皆然。此風何時得息。又傷親故。多遭此禍。歸而作慎疾芻言。刻印萬冊。廣送諸人。冀世人之或悟也。雄按慎疾芻言。今罕流傳。海豐張柳吟先生加以按語。改題曰醫砭。欲以砭庸流之陋習也。余已刊入叢書。

### 暑邪熱呢

東山席士俊者。暑月感冒。邪留上焦。神昏呢。醫者以為壞證。不治。進以參附等藥。呢益甚。余曰。此熱呢也。呢在上焦。令食西瓜。群醫大譁。病者聞余言。即欲食。食之呢漸止。進以清降之藥。二劑而諸病漸愈。又有戚沈君倫者。年七十。時邪內陷而呢逆。是時余有揚州之行。乃囑相好尤君在涇曰。此熱呢也。君以枇杷葉鮮蘆根等清降之品飲之。必愈。尤君依余治之。亦痊。蓋呢逆本有二因。由於虛寒。逆從臍下而起。其根在腎。為難治。由於熱者。逆止在胸臆間。其根在胃。為易治。輕重懸絕。世人謂之冷呢。而概從寒治。無不死者。死之後。則云凡呢逆者。俱為絕證。不知無病之人。先冷物。後熱物。冷熱相爭。亦可呢逆。不治自愈。人所共見。何不思也。

### 瘧

洞庭姜錫常。長郎佩芳。醴素弱。而患久瘧。時余應山前葉氏之招。便道往晤。佩芳出診。色天脈微。而動易出汗。余駭曰。汝今夕當大汗出。而亡陽矣。急進參附。或可挽回。其父子猶未全信。姑以西洋參三錢。偕附子飲之。仍回葉宅。夜二鼓。叩門聲甚急。啟門而錫常以肩輿來迎。至則汗出如膏。兩目直視。氣有出無入。猶賴服過參附。陽未遽脫。適余偶帶人參錢許。同附子童便灌入。天明而汗止。陽回。始知人事。然猶聞聲即暈。倦臥不能起者兩月。而後起。坐上工治未病。此之謂也。如此危急之證。不但誤治必死。即治之稍遲。亦不及挽回。養生者。醫理不可不知也。



痢

崇明施姓遷居郡之盤門其子患暑毒血痢晝夜百餘行痛苦欲絕嘉定張雨亭其姻戚也力懇余診之余曰此熱毒蘊結治之以黃連阿膠等藥一服而去十之七八矣明日再往神清氣爽面有喜色余有事歸家約隔日重來歸後遇風潮連日行舟斷絕三日後乃得往診病者怒目視余問以安否屬聲而對曰用得好藥病益重矣余心疑之問其父曾服他人藥否隱而不言余甚疑之辭出有二醫者入門因託雨亭訪其故其父因余不至延郡中名醫仍進以人參乾薑等藥給病者曰視汝脉者此地名醫而藥則用徐先生方也及服而痛愈劇痢益增故恨余入骨耳豈不冤哉又聞服藥之後口乾如出火欲啖西瓜醫者云痢疾啖西瓜必死欲求涼水尤禁不與因給其童取井水漱口奪盆中水飲其半號呼兩日而死近日治暑痢者皆用傷寒論中治陰寒入臟之寒痢法以理中湯加減無不腐臟慘死甚至有七竅流血者而醫家病家視為一定治法死者接踵全不知悔最可哀也

東山葉寶倫患五色痢每日百餘次余悉治痢之法治之五六日疾如故私竊怪之為撫其腹腹內有塊大小各一儼若葫蘆形余重揉之大者裂破有聲暴下五色濃垢斗許置烈日中光彩眩目以後痢頓減飲食漸進再揉其小者不可執持亦不能消痢亦不全止令其不必專力治之准以開胃消積之品稍稍調之三四月而後塊消痢止大抵積滯之物久則成囊成癖凡病皆然古人原有此說但元氣已虛不可驟消惟養其胃氣使正足自能驅邪信各有法度不可并邪亦補之耳

瘧痢

東山姜錫常氣體素弱又患瘧痢每日一次寒如冰而熱如炭隨下血痢百餘次委頓無生理因平日相契不忍委之朝夕診視為分途而治之寒禦其寒熱清其熱痢止其痢俱用清和切病之品以時消息而

最重者在保其胃氣無使生機又絕經云食養盡之無使過之傷其正也諸證以次漸減而愈或謂如此大虛何以不用峻補余曰寒熱未止必有外邪血痢未清必有內邪峻補則邪留不去如此虛人可使邪氣日增乎去邪毋傷正使生機漸達乃為良策錫常亦深會此意而醫理漸明嗣後小病皆自治之所謂三折肱者也

### 畏寒

洞庭卜夫人患寒疾有名醫進以參附日以為常十年以來服附子數十觔而寒愈劇初冬即四面環火綿衣幾重寒慄如故余曰此熱邪併於內逼陰於外內經云熱深厥亦深又云熱極生寒當散其熱使達於外用蘆根數兩煎清涼疏散之藥飲之三劑而去火十劑而減衣常服養陰之品而身溫逾年附毒積中者盡發周身如火燒服寒涼得少減既又遍體及頭面口鼻俱生熱瘡下體俱腐爛膿血淋漓余以外科治熱毒之法治之一年乃復以後年彌高而反惡熱與前相反不知其理而更進以熱藥則熱併於內寒併於外陰陽離絕而死死之後人亦終以為陽虛而死也

### 畏風

嘉善許閣學竹君夫人抱疾醫過用散劑以虛其表繼用補劑以固其邪風入葉中畏風如矢閉戶深藏者數月與天光不相接見微風則發寒熱而暈延余視余至臥室見窗榻皆重布遮蔽又張帷於牀前暖帳之外周以原缺診其脈微軟無陽余曰先為藥誤而避風太過陽氣不接衛氣不閉非照以陽光不可且曬日中藥乃效閣學謂見日必有風奈何曰姑去其瓦令日光下射曬之何如如法行之三日而能啟窗戶十日可見風諸病漸愈明年閣學挈眷赴都舟停河下邀余定常服方是日大風臨水窗候脈余甚畏風而夫人不覺也蓋衛氣固則反樂於見風此自然而然不可勉強也 雄按論證論治可與戴人頡

頑

疾

嘉興朱宗周以陽盛陰虧之體又兼痰凝氣逆醫者以溫補治之胸膈痞塞而陽道痿群醫謂脾腎兩虧將恐無治就余於山中余視其體豐而氣旺陽升而不降諸竅皆閉笑謂之曰此為肝腎雙實證先用清潤之品加石膏以降其逆氣後以消痰開胃之藥滌其中宮更以滋腎強陰之味鎮其元氣陽事即通五月以後妾即懷孕得一女又一年復得一子惟覺周身火太旺更以養陰清火膏丸為常饌一或間斷則火旺隨發委頓如往日之情形矣而世人乃以熱藥治陽痿豈不謬哉 雄按今秋藩庫吏孫位申積勞善怒陡然自汗凜寒腕疲效逆嘔吐苦水延余診之脈弦軟而滑形瘦面黎苔黃不渴漫亦便難以二陳去甘草加沙參竹茹枇杷葉竹葉黃連薤仁為劑渠云陽痿已匝月矣恐不可服此涼藥余曰此陽氣上升為痰所阻而不能下降耳一服逆平痛定嘔罷汗止即能安穀原方加人參旬日陽事即通諸恙若失

蘇州府治東首楊姓年三十餘以狎游私用父千金父庭責之體虛而兼鬱怒先似傷寒後漸神昏身重醫者以為純虛之證惟事峻補每日用人參三錢痰火愈結身強如尸舉家以為萬無生理余入視時俱環而泣余診畢及按其體偏身皆生痰核大小以千計余不覺大笑泣者盡駭余曰諸人之泣以其將死耶試往府中借大板重打四十亦不死也其父聞之頗不信曰如果能起現今喚人參費千金矣當更以千金為壽余曰此可動他人余無此例也各盡其道而已立清火安神極平淡之方佐以未藥一服三日而能言五日而能坐一月而行動如常其時牡丹方開其戚友為設飲花前以賀余適至戲之曰君服人參千金而幾死服未藥而愈藥本可不償乎其母舅在旁曰必當償先生明示幾何余曰增病之藥值

千金去病之藥自宜倍之病者有驚惶色余曰無恐不過八文錢買葷子為末且尚有服膳者群取視之果葷子也相與大笑其周身結核皆補任痰邪所凝成者半載方消邪之不可留如此幸而結在膚膜若入臟則死已久矣 雄按今夏劉午亭年六十三歲久患痰喘自汗群醫皆以為虛補劑備施竟無效徐月巖囑其挽余視之汗如雨下扇不停揮睛凸顯高面浮頸大胸前痞塞脈滑而長妻乞求慮其暴脫余曰將塞死矣何脫之云與導痰湯加旋覆海石澤瀉白前一飲而減七日後顛門始平匝月而愈繼有顧某年五十六歲肥白多痰因咳連子匝月漸覺不飢喘逆自汗無眠以為虛也屢補之後氣逆欲死連余視之苔黃澀赤脈滑不調以清肺滌痰治之而愈旋以茯苓飲善其後

### 痰喘

松江王孝賢夫人素有血證時發時止發則微嗽又因感冒變成痰喘不能著枕日夜俯几而坐竟不能支持矣是時有常州名醫法丹書調治無效延余至余曰此小青龍證也法曰我固知之但弱體而素有血證麻桂等藥可用乎余曰急則治標若更喘數日則立斃矣且治其新病愈後再治其本病可也法曰誠然病家焉能知之治本病而死死而無怨如用麻桂而死則不咎病本無治而恨麻桂殺之矣我乃行道之人不能任其咎君不以醫名我不與聞君獨任之可也余曰然服之有害我自當之但求先生不阻之耳遂與脫飲畢而氣平就枕終夕得安然後以消痰潤肺養陰開胃之方以次調之體乃復舊法翁頗有學識並非時俗之醫然能知而不能行者蓋欲涉世行道萬一不中則謗聲隨之余則不欲以此求名故毅然用之也凡舉事一有害關心即不能大行我志天下事盡然豈獨醫也哉 雄按風寒外束飲邪內伏動而為喘嗽者不能舍小青龍為治案中云感冒是感冒風寒設非風寒之邪麻桂不可擅用讀者宜有會心也

痰喘亡陰

蘇州沈母患寒熱痰喘。浼其婿毛君延余診視。先有一名醫在座。執筆沈吟曰：大汗不止。陽將亡矣。奈何。非參附熟地乾薑不可。書方而去。余至不與通姓名。俟其去乃入診。脉洪大。手足不冷。喘汗淋漓。余顧毛君曰：急買浮麥半合。大棗七枚。煮湯飲之可也。如法服而汗頓止。乃為立消痰降火之方。二劑而安。蓋亡陽亡陰相似而實不同。一則脈微汗冷如膏。手足厥逆而舌潤。一則脉洪汗熱不粘。手足溫和而舌乾。但亡陰不止。陽從汗出。元氣散脫。即為亡陽。然當亡陰之時。陽氣方熾。不可即用陽藥。宜收斂其陽氣。不可不知也。亡陰之藥宜涼。亡陽之藥宜熱。一或相反。無不立斃。標本先後之間。辨在毫髮。乃舉世更無知者。故動輒相反也。雄按：吳馥齋令姪體屬陰虧。歸沈氏後。余久不診。上年聞其久嗽。服大劑滋補。而能食。肌充以為愈矣。今夏延診云：嗽猶不愈。及往視。面浮色赤。脈滑不調。舌絳而乾。非肉不飽。曰：此痰火為患。患不可以音嘶脇痛。遂疑為損怯之末傳。予清肺化痰藥為丸。喻化使其廓清。上膈果膠痰漸吐。各恙乃安。其形復瘦。始予養陰善後。病者云：前進補時。體頗漸豐。而腰間痠脹。略一撫摩。嗽即不已。自疑為痰。而醫者謂為極虛所致。補益加峻。釀為偏體之痰也。

觀察毛公裕。年屆八旬。素有痰喘病。因勞大發。俯几不能臥者七日。舉家驚惶。延余視之。余曰：此上實下虛之證。用清肺消痰飲。送下人參小塊一錢。二劑而愈。毛翁曰：徐君學問之深。固不必言。但人參切塊之法。此則聰明人以此銜奇耳。後歲餘。病復作。照前方加人參煎入。而喘逆愈甚。後延余視。述用去年方而病有加。余曰：莫非以參和入藥中耶。曰然。余曰：宜其增病也。仍以參作塊服之。亦二劑而愈。蓋下虛固當補。但痰火在上。補必增盛。惟作塊則參性未發。而清肺之藥已得力。過腹中而人參性始發。病自獲痊。此等法古人亦有用者。人自不知耳。於是羣相歎服。雄按：痰喘礙眠。亦有不兼虛者。黃者。辛年踰五旬。自

云冬因勞患喘迄今春兩旬不能臥顧某作下喘治病益甚又旬日近余視之脈弦滑苔滿布舌邊絡乃冬溫薄肺失於清解耳予輕清肅化藥治之而痊至參不入煎欲其下達與凡藥喻化欲其上戀皆有妙義用藥者勿以一煎方為了事也又有虛不在陰分者余治方嘯山今秋患痰喘汗多醫道清降藥數劑遂便溏肢冷不食礙眠氣逆腕疼面紅汗冷余診之脈弦軟無神苔白不渴乃寒痰上實腎陽下虛也以真武湯去生薑加乾薑五味人參厚朴杏仁一劑知二劑已又治顧某體肥白脈沈弱痰喘易汗不渴痰多啜粥即嘔以六君去甘草加厚朴杏仁薑汁川連蓋中虛痰滯也投七日果愈

飲癖

洞庭席載岳素腸下留飢發則大痛嘔吐先清水後黃水再後吐黑水而兼以血哀苦萬狀不能支矣愈則復發余按其腹有塊在左脇下所謂飲囊也非消此則病根不除法當外治因合蒸藥一料用麪作團放藥在內上蓋銅皮以艾火蒸之日十餘次蒸至三百六十火而止依法治三月而畢塊盡消其病永除年至七十七而卒此病極多而醫者俱不知雖輕重不一而蒸法為要 雄按今夏江陰沙沛生齋尹患胸下痞悶腹中聚塊臥則臍間有氣下行至指而惕然驚寤余謂氣鬱飲停治以通降適渠將赴都自慮體弱有醫者迎合其意投以大劑溫補初若相安旬日後神呆不語目眩不飢便閉不眠寒熱時作復延余診按其心下則濯濯有聲環臍左右塊已疊疊溺赤苔黃脈弦而急幸其家深信有年旁無掣肘凡通氣滌飲清絡舒肝之劑調理三月各恙皆瘳

翻胃

嘉興朱亭立曾任廣信太守向病嘔吐時發時愈是時吐不止粒米不下者三日醫以膈證回絕其友人來邀診余曰此翻胃證非膈證也膈乃胃脘乾枯翻胃乃痰火上逆輕重懸殊以半夏瀉心湯加減治之

漸能進食。尋復舊。從此遂成。知已。每因飲食無節。時時小發。且不善飯。如是數年。非余方不服。甚相安也。後余便道過其家。謂余曰。我遇武林名醫。謂我體虛。非參附不可。令服其方。覺強旺。加餐。余謂此乃助火以腐食。元氣必耗。將有熱毒之害。亭立笑而腹非之。似有恨不早遇此醫之意。不兩月。遣人連夜來迎。即登舟。抵暮入其寢室。見牀前血汗滿地。駭問。故亭立已不能言。惟垂淚引過作泣別之態而已。蓋血湧斗餘。無藥可施矣。天明而逝。十年幸活。殞於一朝。天下之服熱劑而隱受其害者。何可勝數也。雄按。服溫補藥而強旺。加餐。病家必以為對證矣。而孰知隱受其害哉。更有至死而猶不悟者。目擊甚多。可為歎息。

婁門范昭素患翻胃。粒米不能入咽者月餘。胸中如有物蠢動。余曰。此蟲隔也。積血所成。舉家未信。余處以開膈末藥。佐以硫黃。三劑後。吐出瘀血半甌。隨吐蟲二十餘枚。長者徑尺。短者二寸。色微紫。其腸俱空。乃藥入而蟲積食之。皆洞腸而死者。舉家驚喜。以為病愈。余曰。未也。姑以粥與之。連進二碗。全然不嘔。更覺寬適。項之粥停不下。不能再食。余曰。胃腑已為蟲蝕。無藏食之地。無救也。辭不復用藥。不旬日而卒。

呢  
郡中陸某患呃逆。不過偶爾。胃中不和。杖痰挾氣。世俗所謂冷呃也。不治自愈。非若病後呃逆。有虛實寒熱之殊。關於生死也。陸乃膏粱之人。從未患此。遂大懼。延醫調治。醫者亦大駭。云。此必大虛之體。所以無病見此。即用參白朮等藥。痰火凝結。而胃絡塞。呃逆不止。病者自問必死。舉家驚惶。余診視之。不覺狂笑。其昆仲在旁。怪而問。故余曰。不意近日諸名醫冒昧至此。此非病也。一劑即愈矣。以瀉心湯加旋覆花。枇杷葉。果一劑而呃止。越一月。呃又發。仍用前日諸醫治之。數日而死。其老僕素相熟。偶過於他所。問其主人安否。因述其故。余曰。前幾死。我以一劑救之。何以蹈覆轍。曰。眾論紛紛。謂補藥一定不錯。直至臨死。

時欲來敦請已無及矣。嗚呼豈非命耶。雄按吳雨峯大令年七十一歲。今秋患感發熱而兼左脇偏痺。舌色乾紫無苔。稍啞湯飲小溲即行不食不便脈洪且數。余知其平素津虛脾約氣滯痰凝。連予輕肅宣濡之劑。熱漸緩脇漸舒。而舌色不潤仍不喜飲。溲亦便閉。呃逆頻來。舉家皇皇。余曰無恐也。便行即止矣。踰二日連得暢解。脈靜身涼。舌色有津。呃仍不減。人皆謂高年病後之虛。呃議用鎮補。余曰此氣為痰阻升降失調。得食不舒。平時無嘔是其徵也。授以枳桔湯加薑。雖薑如橘。半柴胡果一劑知。二劑已。

### 癰

學宮後金汝玉忽患小便不通。醫以通利導之水愈聚而溺管益塞。腹脹欲裂。水氣衝心。即死。再飲湯藥。必不能下。而反增其水。余曰。此因溺管閉極不能稍通也。以發腫藥塗之。使溺器大腫。隨以消腫之藥解之一腫。一消。溺管稍寬。再以藥湯洗少腹而擠之。蓄溺湧出而全通矣。此無法中之法也。

本漬某小便閉七日。腹脹如鼓。僂不能立。衝心在頃刻矣。就余山中求治。余以鮮車前根搗爛敷其腹。用諸利水藥內服。又煎利水通氣藥。便坐湯中。令人揉擠之。未幾溺迸出。灑及揉者之面。溺出斗餘。其所坐木桶幾滿。腹寬身直。徜徉而去。雄按兩外治法皆妙。

### 水腫

洞庭席君際飛。形體壯實。喜飲善啖。患水腫病。先從足起。遂及偏身。腰滿腹脹。服利水之藥。稍快。旋即復腫。用鍼針之。水從鍼孔出。則稍寬。鍼眼閉。則復腫。內經有刺水病之法。其穴有五十七。又須調養百日。且服閉藥。而此法失傳。所以十難療。余所治皆愈。而復發。遂至不救。雖因病者不能守法。亦由醫治法不全耳。惟皮水風水則一時之驟病。驅風利水無不立愈。病固各不同也。



消

常熟汪東山夫人患消證夜尤甚每夜必以米二升煮薄粥二十碗而溲便不異常人此乃為火所燻也先延郡中葉天士治以烏梅木瓜等藥斂其胃氣消證少瘥而煩悶羸瘦飲食無味余謂此熱痰凝結未  
有出路耳以清火消痰兼和中開胃調之病情屢易隨證易方半年而愈

蟲痛

蘇州黃四房女年十二患腹痛愈醫愈甚余偶至其家昏厥一夕方甦舌俱咬破流血盈口脣白而目猶直視脈參錯無常余曰此蟲痛也貫心則死非煎藥所能愈合化蟲丸與之痛稍緩忽復更痛吐出蟲二十餘條長者徑尺紫色餘長短不齊淡紅色亦有白者自此而大痛不復作小痛未除蓋其窠未去也復以殺蟲之藥兼安胃補脾之方調之而蟲根遂絕蓋此證甚多醫者既不能知惟認為寒與食即以為蟲又無殺蟲之方在精力強旺者久能自化其不足者變為丁奚勞怯痞臆等證至死而人不能知亦可哀也余治此證不一姑舉其最劇者以明治法

常州蔣公諱斌之孫患心腹痛上及於頭時作時止醫藥罔效向余求治余曰此蟲病也以殺蟲之藥蟲即遠避或在周身皮膚之中或在頭中按之如有蠕動往來之象余用殺蟲之藥為末調如糊到處敷上而以熟物熨之蟲又逃之他處隨逃隨敷漸次平安而根終不除遂授方令歸越二年書來云蟲根終未盡但不甚為害耳此真奇疾也

怔忡

淮安巨商程某母患怔忡日服參朮峻補病益甚聞聲即暈持厚聘邀余余以老母有恙堅辭未往不得已來就醫診視見二女僕從背後抱持二女僕徧體敲摩呼太太無恐吾儕俱在也猶驚湯不已余以消

痰之藥去其涎以安神之樂養其血以重墜補精之藥納其氣稍得寢半月餘驚恐全失開船放炮亦不為動船擠喧嚷歡然不厭蓋心為火藏腎為水藏腎氣挾痰以衝心水能剋火則心振蕩不能自主使各安其位則不但不相尅而且相濟自然之理也

長興趙某以經營過勞其心患怔忡證醫者議論不一遠來就余余以消痰補心之品治其上滋腎納氣之藥治其下數日而安此與程母病同而法稍異一則氣體多痰誤服補劑水溢而火受剋之證一則心血虛耗相火不寧侵犯天君之證不得混淆也

### 亢陽

姻戚殷之昔年近八旬素有腸紅證病大發飲食不進小腹高起陰囊腫亮昏不知人余因新年賀歲候之正辦後事余診其脈洪大有力先以竈灰石灰作布袋置陰囊於上袋濕而囊腫消飲以知母黃柏瀉腎之品越三日余飲於周氏周與至戚相近半里忽有叩門聲啟視之則其子扶病者至在座無不驚喜同問余曰何以用伐腎之藥而愈余曰此所謂欲女子而不得也眾以為戲言翁曰君真神人也我嚮者館穀京師患亦相似主人以為無生理也遂送我歸歸旬日即痊今妻妾盡亡獨處十餘年貧不能蓄妻又恥為苟且之事故病至此既不可以告人亦無人能知之者言畢悽然淚下又閱五年而卒蓋人之氣稟各殊亢陽之害與縱慾同非通於六經之理與岐黃之奧者不足與言也 雄按縱慾固傷陰而亢陽亦燠陰知柏瀉腎者瀉腎火之有餘而保其不足之水也

### 吐血

平望鎮張瑞五素有血證歲辛丑余營葵先君託其買磚灰等物鄉城往返因勞悴而大病發握手泣別謂難再會矣余是時始合瓊玉膏未試也贈以數兩而去自此不通音問者三四載一日鎮有延余者出

其前所服方問何人所寫則曰張瑞五曰今何在曰即在館橋之右即往候之精神強健與昔迥異因述服瓊玉膏後血不復吐嗽亦漸止因涉獵方書試之頗有效以此助館穀所不足耳余遂導以行醫之要惟存心救人心小敬慎擇清淡切病之品俾其病勢稍減即無大功亦不貽害若欺世徇人止知求利亂投重劑一或有誤無從挽回病家縱不知我心何忍瑞五深以為然後其道大行遂成一鎮名家年至七十餘而卒瓊玉膏為治血證第一效方然合法頗難其時不用人參祇用參鬚生地則以浙中所出鮮生地打自然汁熬之不用乾地黃治血證舍此無有無弊者 雄按行醫要訣盡此數語所謂以約失之者鮮學者勿以為淺論也

洞庭吳倫宗夫人席翁士俊女也向患血證每發余以清和之藥調之相安者數年郡中名醫有與席翁相好者因他姓延請至山適遇病發邀之診視見余前方謂翁曰此陽虛失血此公自命通博乃陰陽不辨耶立溫補方加鹿茸二錢連服六劑血上冒連吐十餘碗一身之血盡脫脈微自閉面青唇白奄奄待斃急延余治余曰今藏府經絡俱空非可以輕劑治亟以鮮生地十觔絞汁煎濃略加人參末徐徐進之歷一晝夜盡生地汁稍知人事手足得展動唇與面紅白稍分更進阿膠三七諸養陰之品調攝月餘血氣漸復夫血脫補陽乃指大脫之後陰盡而陽無所附肢冷汗出則先用參附以回其陽而後補其陰或現種種虛寒之證亦當氣血兼補豈有素體陰虛之人又遇氣升火旺之時偶爾見紅反用大熱升發之劑以擾其陽而燥其陰乎此乃道聽塗說之人聞有此法而不能深思其理誤人不淺也

嘉興王蔚南久患血證左脇中有氣逆衝喉旁血來有聲如沸戊子冬忽大吐數升面色白而帶青脈微聲啞氣喘不得臥危在旦夕余以阿膠三七等藥保其陰而止其血然後以降火納氣之品止其衝逆復以補血消痰健脾安胃之方上下分治始令能臥繼令能食數日之後方能安臥大凡脫血之後斷不可

重用人參升氣助火亦不可多用滋膩以助痰滯胃要知補血之道不過令其陰陽相和飲食漸進則元氣自復非補劑入腹即變為氣血也若以重劑塞其胃口則永無生路矣况更用溫熱重劑助陽燥陰而速之死乎

洞庭張姓素有血證是年為女辦裝過費心力其女方登轎張忽血冒升餘昏不知人醫者濃煎參湯服之命懸一息邀余診視六脈似有如無血已脫盡急加阿膠三七少和人參以進脈乃漸復目開能言手足展動然後純用補血之劑以填之月餘而起蓋人生不外氣血兩端血脫則氣亦脫用人參以接其氣氣稍接即當用血藥否則孤陽獨旺而陰愈虧先後主客之分不可不辨也

### 瘀留經絡

烏鎮莫秀東患奇病痛始於背達於胸脇晝則飲食如常暮乃痛發呼號徹夜鄰里慘聞醫治五年家資蕩盡秀東欲自縊其母曰汝有子女之累尚須冀念不如我死免聞哀號之聲欲赴水其戚憐之引來就醫余曰此瘀血留經絡也因謂余子熾曰此怪病也廣求治法以療之非但濟人正可造就己之學問因留於家用針灸熨塌煎丸之法無所不備其痛漸輕亦漸短一月而愈其人感謝不置余曰我方欲謝子耳凡病深者須盡我之技而後奏功今人必欲一劑見效三劑不驗則易他醫子獨始終相信我之知己也能無感乎

### 腸紅

淮安程春谷素有腸紅證一日更衣忽下血斗餘暈倒不知人急灌以人參一兩附子五錢而甦遂日服人參五錢附子三錢而雜以他藥參附偶間斷則手足如冰語言無力醫者亦守而不變僅能支持急棹來招至則自述其全賴參附以得生之故診其六脈極洪大而時伏面赤有油光舌紅而不潤目不交睫

者旬餘矣。余曰：病可立愈，但我方君不可視也。春谷曰：我以命託君，止求效耳，方向必視。余用茅草根四兩作湯，兼清涼平淡之藥數品，與參附正相反。諸戚友俱駭。春谷弟風衣明理見道之士也，謂其諸郎曰：爾父千里招徐君，信之至。徐君慨然力保無虞，任之至。安得有誤耶？服一劑，是夕稍得寢。二劑，手足溫。三劑，起坐不眩。然後示之以方。春谷駭歎，諸人請申其說。余曰：血脫扶陽，乃一時急救之法。脫血乃亡陰也。陽氣既復，即當補陰，而更益其陽，則陰血愈虧。更有陽亢之病，其四肢冷者，內經所謂熱深厥亦深也。不得臥者，內經所謂陽勝則不得入於陰，陰虛故目不瞑也。白茅根交春透發，能引陽氣達於四肢，又能養血清火，用之使平日所服參附之力，皆達於外，自能手足溫而臥矣。於是始相折服。凡治血脫證，俱同此。雄按論治既明，而茅根功用尤為發人所未發。

### 血痢

洞庭葛允誠患血痢五年，日夜百餘次，約去血數石，骨瘦如柴，飲食不進。舉家以為必無生理。余友姜君錫常次子善芳從余學醫於山中，病者即善芳妻弟也。錫常憐之，令同善芳寄膳余家。朝夕診視，余先用滋補之劑以養其血脈，復用開胃之藥以滋其化源，稍健而能食。久痢至五載，大腸之內必生漏管，遂以填補之品塞其空竅，痢日減，飯日增，不半年而每食飯必六七碗。至及病全愈，豐肥強壯，歸至家親戚俱不相識，認無不歎以為奇。

### 崩

徽州鹽商汪姓始富，終貧。其夫人年四十六，以憂勞患崩，證參附諸藥而病益劇。延余治之，處以養血清火之劑，而病稍衰。蓋此病本難除根也。越三年夫卒，欲往武林依其親戚。過吳江，方且泣曰：我遇先生而得生，今遂去，病發必死耳。余為立長服方，且贈以應用丸散而去。閱十數年，郡中有洋客請治其室。

人一白頭老嫗出拜余驚問曰我即汪某妻也服先生所贈方藥至五十二而崩證絕今已六十餘強健逾昔我婿迎我於此病者即我女也不但求治我女必欲面謝故相屈耳蓋崩證往往在五十歲以前天癸將絕之時而衝任有火不能攝納橫決為害至五十以後天癸自絕有不藥而愈者亦有氣旺血熱過時而仍有此證者當因時消息總不外填陰補血之法不知者以溫熱峻補氣愈旺而陰愈耗禍不旋踵矣此極易治之病而往往不治蓋未能深攷其理而誤殺之耳

### 瘀血衝厥

東山水利同知借余水利書余往索出署突有一人攔輿喊救命謂我非告狀欲求神丹奪命耳其家即對公署因往視病者死已三日方欲入棺而睂目忽動按其心口尚溫誤傳余能起死回生故泥首哀求余辭之不獲乃給之曰余舟中有神丹可救因隨之舟中與黑神丸二粒教以水化灌之非能必其效也隨即歸家後復至山中其人已生蓋此乃瘀血衝心厥而不返黑神丸以陳墨為主而以消瘀鎮心之藥佐之為產後安神定魄去瘀生新之要品醫者苟不預備一時何以奏效乎

### 胎中毒火

南門陳昂發夫人懷娠三月胎氣上逆舌腫如蛋色紫黑粒米不能下醫者束手延余治余曰此胎中有毒火衝心舌為心苗故毒聚於舌腫塞滿口則飲食絕矣乃用珠黃散反解毒軟堅之藥屢塗其舌腫漸消而納食復用清涼通氣之方消息治之或謂解毒清火與胎有害余曰不然胎氣旺甚愈涼愈安但熱毒傷陰當滋養其血氣耳乃專服余藥孿生二子後詢其得病之故乃曾聽邪人之言服不經之藥幾致傷生可為戒也

### 子利

爛溪潘開子表弟其夫人懷娠患病晝夜百餘次延余視余以黃芩湯加減兼養胎藥飲之利遂減飲食得進而每日尚數十次服藥無效余曰此不必治名曰子利非產後則不愈但既產恐有變證耳病家不信更延他醫易一方則利必增劇始守余言止服安胎藥少許後生產果甚易而母氣大衰虛象百出適余從浙中來便道過其門復以產後法消息治之病痊而痢亦止蓋病有不必治而自愈強求其愈必反致害此類甚多不可不知也 雄按此所謂利即是泄瀉古人名曰利下非今之痢也痢疾古名滯下若胎前久痢不愈產後其能免乎

### 試胎

余往候族兄龍友坐談之際有老嫗惶遽來曰無救矣余駭問故龍友曰我姪婦產二日不下穩婆已回絕矣問何在曰即在前巷余曰試往診之龍友大喜即同往漿水已涸疲極不能出聲穩婆猶令用力送下余曰無恐此試胎也尚未產勿強之扶令安臥一月後始產產必順且生男穩婆聞之微哂作不然之態且曰此何人說此大話我收生數十年從未見有如此而可生者其家亦半信半疑余乃處以養血安胎之方一飲而胎氣安和全無產意越一月果生一男而產極易眾以為神龍友請申其說曰凡胎旺而母有風寒勞碌等感動則胎墜下如欲生之象安之即愈不知而以為真產強之用力則胎漿破而胎不能安矣余診其胎脈甚旺而月分未足故知不產今已搖動其胎將來產時必易脫故知易產左脈甚旺故知男胎此極淺近之理人自不知耳

### 產後風熱

西濠陸炳若夫人產後感風熱瘀血未盡醫者執產後屬虛寒之說用乾薑熟地治之且云必無生理汗出而身熱於炭脣燥舌紫仍用前藥余是日偶步田間看菜花近炳若之居趨迎求診余曰生產血枯火

熾又兼風熱復加以剛燥滋膩之品益大塞竅以此死者我見甚多非石膏則陽明之盛大不解遵仲景  
法用竹皮石膏等藥余歸而他醫至笑且非之謂自古無產後用石膏之理蓋生平未見仲景方也其母  
素信余立主服之一劑而甦明日炳若復求診余曰更服一劑病已去矣無庸易方如言而愈醫者群以  
為怪不知此乃古人定法惟服薑桂則必死

### 產後血厥

蘇州顧某繼室產後惡露不出遂成血厥醫者束手顧君之兄掌夫余戚也延余治之余曰此瘀血凝結  
非桃仁等所能下古法有抵當湯今一時不及備以唐人法用肉桂黃連人參大黃五靈脂成劑下其瘀  
血羣醫無不大笑謂寒熱補瀉并相犯之藥合而成方此怪人也其家因平日相信與服明日掌夫告余  
曰病不可治矣病者見鬼竊飲所服藥乃大呼曰我不能食鬼之所吐也先生可無治矣余往驗之藥本  
氣味最烈之品嘗之與水無二怪之仍以前方煎成親往飲之病者不肯飲以威迫之懼而飲是夕下於  
血升餘而腹漸平思食余以事暫歸隔日復往其門首掛榜燒楮余疑有他故入門見者皆有喜色詢之  
則曰先生去之夕病者夢其前夫人怒曰汝據余之室奪余之財產余之女余欲傷汝命今為某所治余  
將為大蛇以殺汝即變為大蛇大驚而醒故特延僧修懺耳蓋前夫人以產後血厥亡病狀如一而醫者  
治不中病遂致不起蓋一病有一病治法學不可不博也

### 產後腸癰

洞庭某婦產後小腹痛甚惡露不止奄奄垂斃余診之曰惡露如此多何以其痛反劇更詢其所行之物  
又如膿象余曰此乃子宮受傷腐爛成癰也宜令名手穩婆探之果然遂用絲作條裹入生肌收口之藥  
而內服解毒消痰之方應手而愈凡產後停瘀每多外證如此甚多不可不知也



惡痘

吳超士家僅已弱冠。隨超士往戲館觀劇。因寒熱作而先歸。夜半呻吟不絕。至明旦往視。則匿於牀下。口稱群鬼欲殺之。搜出視之。細點如麩。余曰。此惡痘也。色暗紫。急以升麻羌活生地等藥煎湯灌之。三日而痘形出。偏體無毫孔。頭面結聚重疊。始終用滋養氣血之品。不用時下惡藥一味。二十餘日始結痂。焦黑成片。大如手掌。形如缸片。剝去之後。非復本來面目。見者俱不相識。可知痘證之必死者絕少。皆醫以寒涼剋伐之藥誤之也。毛履和之女患痘。醫者曰。此悶痘也。五日而斃。舉家扼腕。適余至。曰。先生亦治痘否。余曰。醫者不肯治之。痘則治。曰。已回絕矣。因入視。偏體大熱。神昏不語。細點如魚子。隱在肉中。余急以升麻羌活湯為主。而佐以養血透肌藥。飲之三日。而痘形顯。前醫群駭告之。以故則又大笑曰。升麻羌活等藥。豈入痘科。不知升麻湯乃痘證初起之主方。而醫者不知也。繼以養血解毒補氣之品。其結痂也。額如覆釜。身如樹皮。髮連痂脫。三年始生時。醫見此等證。必用大黃石膏及惡毒之物。虛其裏而增其毒。五日而斃之。言必驗。病家亦以為醫者斷期如神。孰知非其識之高。乃其藥之靈也。嗚呼。慘哉。余同學沈冠雲之女。痘密黑陷而無漿。醫者束手。冠雲告以故。余曰。姑處以補託之法。用地黃歸身黃耆人參等藥。間者咸笑。一服而漿來。至明日。以參貴停服。余曰。精力不充。毒發未盡。未盡必生痘毒。後果臂灣生二毒。復為治之。而安。

余長孫女種痘。點密而色深赤。種痘之醫束手。余用清發之藥。并時含紫雪。赤色稍衰。將就寢。復往視。忽變灰白色。而咬牙。余驚曰。證變虛寒矣。此所謂元害承制也。即用人參鹿茸等藥託之。至三鼓而瘡色復紅。形漸高起。仍用清火養血之方。而漿成。蓋病變無常。頃刻轉易。故凡屬危險之證。醫者當時時消息。不可片刻離也。但不明理之醫。則偏僻固執。又方法絕少。不能肆應。不窮耳。

流注

蘇州一小兒甫九齡頗聰慧而患流注肩背腰脇十餘處百端醫治無效余視之曰此惟大活絡丹能愈服至三十餘丸未破者消已破者收口更服補氣血之藥而愈蓋流注一證由風寒入膜所致膜在皮中旁通四達初無定處所以隨處作患此真脈絡之病故古人製大活絡丹以治之其餘煎丸皆非正治所謂一病有一病之法藥不對證總難取效也

本邑劉近曾夫人患虛疾流注色眊脈虛發無定處病極危險非旦夕可奏功余辭不能治郡中一醫以百金包好因留在家治之間余有不能治之說笑曰我醫好後更請徐君質之當無言可對耳月餘劉君之兄元谷招余診近曾出口流注之疾難向愈而未收口託在相好肯一觀否余因視之肩後瘡孔大如錢內膜乾空與皮不連氣促脈微診畢而出近曾求方余笑不答書危在頃刻四字劉不信少頃內味劉父子入已氣絕矣羣執包好之醫欲加以無禮余曉之曰此病本不治非藥誤也但不知生死為無目耳乃釋之蓋流注之證其類不同大段皆津液枯而疾流膜內之證當內外交治而祛邪補虛亦另有切病方藥變補無益也

嘉善張卓舟未弱冠患流注五年自脇及腰腿連生七八孔寒熱不食僅存人形歷年共服人參二三千金萬無生理父母先亡只有慈母其伯悉收其田產文契專待其斃而取之其從兄汪千造余家哀懇余頗憐之破格往視半身幾成枯骨此乃虛疾流注醫者不能治其經絡之疾徒費重資而無一中病者則藥之誤而非病之真無治也余用大活絡丹為主而外敷拔管生肌之藥醫者聞之大笑曰活絡丹罕暴之藥豈可入口蓋彼惟知俗本所載烏頭蚯蚓之活絡丹而不知古方五十餘味之大活絡丹也蓋流注之疾全在於絡故非活絡丹不效以後膿稀肉長管退筋舒漸能起立不二年而肌肉豐肥強健反過於

常嗚呼不知對病施藥徒事蠻補舉世盡然枉死者不知其幾也 雄按大活絡丹治虛疾流注深為合法而外科不知也若實疾則控涎丹最妙

### 腸癰

長興朱季舫少子嘯虎官性極聰敏年九歲腹痛脚縮抱膝而臥背脊突出一癰晝夜哀號編延內外科診視或云損證或云宿食或云發毒當刺突出之骨以出膿血其西席茅宣宿力薦余治往登其堂名醫滿座豈宿偕余診視余曰此縮脚腸癰也幸未成膿四日可消聞者大笑時季舫為潞州牧其夫人孔氏名族之女獨信余言余先飲以養血通氣之方并護心丸痛遂大減諸醫謂偶中耳明日進消痰逐毒丸散謂曰服此又當微痛無恐其夜痛果稍加諸醫聞之譁然曰果應我輩之言也明早又進和榮順氣之劑痛止八九而脚伸眷平果四日而能步諸醫以次辭去中有俞姓者儒士也虛心問故余謂雜藥亂投氣血傷矣先和其氣血自得稍安繼則攻其所聚之邪安能無痛既乃滋養而通利之則藏府俱安矣南濠徐氏女經停數月寒熱減食肌肉消瘦小腹之右下達環跳隱痛微腫醫者或作法弱或作血痺俱云不治余診其脈洪數而滑寒熱無次謂其父曰此瘀血為癰已成膿矣必自破破後必有變證宜急治與以外科託毒方并丸散即返山中越二日天未明叩門甚急啟視則徐之戚也云膿已大潰而人將脫矣即登其舟往視膿出升餘脈微膚冷陽隨陰脫余不及處方急以參附二味煎湯灌之氣漸續而身漸溫然後以補血養氣之品兼託膿長肉之藥內外兼治兩月而漏口方滿精神漸復月事以時大凡瘀血久留必致成癰產後留瘀及室女停經外證極多而醫者俱不能知至膿成之後方覓外科施治而外科又不得其法以致枉死者比比然也

### 腿癰

橫溪錢某之女。素有痞塊。從腹入少腹。又從少腹入環跳之下。大腿外臙。變成大癰。膿水淋漓。成管。管中有飯粒流出。真不可解。日漸狼狽。諸醫束手。其父泣而告余。余曰。寒儉之家。服人參已費百金。而毫無效驗。惟有立而視其兒耳。余曰。人參不可長。繼祛膿填漏。外科自有正方也。乃為合治漏之藥。內服外敷。所服未藥。亦有從瘡口流出者。繼乃漸少。胃氣亦開。肌肉內生。數月之後。痂結筋絡。前此從未生育。期年懷孕生子。凡治病各有對證方藥。非可以泛治之方圖倖倖也。

### 臂疽

長興周某之子。臂生疽。經年膿水不乾。變為多骨。所食米粒間有從疽中出者。奄奄待斃。余為內託外敷。所服末藥。亦從瘡口出。繼而膿漸減少。所出碎骨。皆膿結成。出盡之後。肌肉日長。口收痂結而愈。

### 項疽

郡中朱姓患項疽。大痛徹心。時時出血。延醫施治。漫腫滋甚。神思昏迷。束手待斃。延余視。急用圍藥裹住。根盤敷以止血散。飲以護心丸。痛緩血止。神安得寢。明日前醫來告。以故醫謂同一金黃散。我用無效。彼用神驗。此命運不同。非藥異也。彼蓋不知圍藥每病各殊耳。瘡口已定。乃大託其膿。兼以消痰開胃之品。飲食漸進。坐臥皆安。兩月而愈。凡治癰疽之法。在視其人。之肥瘠瘦弱之軀。尤忌見血。瘡口若大。則肌肉難生。所以最重圍藥。其方甚多。不可不廣求而預備也。

同學沈自求。喪子憂愁鬱結。疽發於項。調治無效。項三倍瘡口。環頸長尺餘。闊三寸。惟近咽喉處二寸未連。而枕骨直下之筋未斷。血流不止。余辭不治。堅懇不已。先進護心丸二粒。令毒不內攻。又付止血散。止其血。外用圍藥厚塗。束其根。更以珠黃等藥。時時敷瘡口上。其膏藥長一尺三寸。再以黃耆四兩煎湯煎藥服之。勢定而飲食稍進。數日血止膿成。肌與腐肉方有界限。瘡口太大。皮肉不能合。以生肌等藥并參

末厚塗而封之。月餘口乃合。病家欲備人參勸許以待用。余曰：無庸也。諸痛癢瘡皆屬於火。膿流肉腐皆傷於陰。凡屬外證總以清火養陰為主。而加開胃健脾之藥。人參止用錢許。數劑即止。此從古一定之法。其用溫補乃後世訛傳之術。無不陰受其害。余凡治大證無不神效。時人多不之信也。

蘇州章倚丈夫。體質本弱。平時飲食絕少。忽患項毒。平漫不腫痛。輒應心。醫者謂大虛之證。投以峻補。毒伏神昏。奄奄一息。延余視之。余曰：毒無補理。瘡口不高。則以圍藥束之。飲以清涼養血之品。託毒於外。兼服護心丸。痛定而瘡根漸收。余暫歸。轉託一醫代治。醫者強作解事。曰：圍藥不過金黃散之類。無益也。去之用藥亦意為改易。以炷己能瘡遂散。大血出不止。痛復甚。而神疲。余再至。大駭詢之。乃知其故。醫者乃不復生議論。於是仍用前法。膿成食進。而後得安。蓋外科病不治者絕少。皆由醫之不得其道。所以動手輒誤。病變日增。而藥無一驗。即束手無策矣。

對口

白龍橋吳時臣年七十餘矣。患對口。痛欲絕。余視其外無圍藥。瘡內反有插藥五條。乃三品一條。瘡此古方蝕頑肉之惡藥。而近日醫者誤以為必用之品。所以痛極昏迷。余悉拔去。摻以珠黃解毒散。其痛立除。而神安。復用圍藥裹住。其根使瘡頭高而膿易出。或謂七旬之人。精力已衰。宜用溫補。余曰：外證俱屬火。苟非現證虛寒。從無用熱藥之理。進清涼開胃之劑。胃氣開。則肌肉自生。調養月餘。而愈。精神較勝前矣。平湖徐榆齋。陰毒對口。頸項漫腫。而色紫。有頭如痘者百餘。神煩志亂。醫者束手。就治於余。余曰：此乃陰毒。兼似有祟。其家為述患病之後。鬼聲繞屋。鬼火不斷。余曰：且敷藥試之。色稍鮮。腫亦稍消。明晨視之色轉淡紅。其如痘者俱出微膿。而依奠中殿一頭。亦不甚大。勢已消其十之三。神亦漸清。而思飲食。病雖屬陰。亦不可用熱藥以增邪火。惟和血通氣使榮衛充盈。使血中一點真陽透出。則陰邪自退。若用熱補。則

反助毒火而生機益絕故治外科之陰證非若傷寒之陰證為外感之寒邪可專用桂附以驅之也今之號外科者惟拾內科之緒論以為熱可禦寒則貽害不小矣

發背

洞庭吳姓從徐州經紀返棹背起粟粒深紫色而痛應心周圍肌肉皆不仁知非輕證未至家而就余治余辭不能再三懇求姑用圍藥束之稍定病者謂我尚未到家當歸處分家事求借一厘如果不治死無餘憾歸二日而復來其瘡不甚大頂微高而堅黑當用刀挑破方可上藥以洋刀點之洋刀堅利非凡竟不能入用力挑之刀頭折乃用金鍼四面刺之以洩毒氣內託外敷其方屢變然後膿從四旁出積蓋自落約深半寸脊背隱露其尖亦腐去急以生肌散填補之內服峻補之劑兩月而肉滿皮完此九死一生之證不早為外東內託則焦骨攻藏無生理矣

周壯陸姓疽發背周徑尺餘一背盡腫頭以百計毒氣內攻沈悶昏迷醫者以平塌無頭用桂附託之余曰此瘡止宜收小若欲加高則根盤如此之大而更加高則背駘栲棧矣此乃火毒用熱藥必死乃以東根提毒之藥敷之一夕而瘡頭俱平皮膚亦潤止有大頭如杯高起於大椎骨之下大三寸許尚不思飲食惟求食西瓜醫嚇以入口即死余令縱其所食一日之內連喫大西瓜兩個明日知飢欲求肉飯食肉四兩飯半碗明日更加始終用託毒清火之劑而膿成口斂余囑曰此疽初起盈背背中脂膜皆空非填補裏膜必有他變有庸醫獻媚曰病已全愈為此說者圖厚謝也我力能保之病家利其省費從之至來年二月忽舊疤中一細眼流血不止放血斗餘兩日而卒蓋其前一背盡腫其中之脂膜俱化成膿從大口出盡庸醫安知治法貪利誤人富貴之家往往最信此等人可不省察耶

對心發

郡中唐廷發偶過余寓時方暑謂背昨晚起一小瘰癧之甚癢先生肯一看否余視之駭曰此對心發也唐不甚信曰姑與我藥余曰君未信余言一服藥而毒大發反疑我誤君矣含笑而去明日已大如酒杯而痛甚乃求醫治余曰此非朝夕換方不可我不能久留郡寓奈何因就醫余家旦暮易法其中變遷不一卒至收口其收口前十日忽頭痛身熱神昏謔語瘡口黑陷六脈參差余適出門兩日歸而大駭疑為瘡證變重幾無可藥細詢其僕乃貧涼當風而臥瘡口對風膏藥又落風貫瘡中即所謂破傷風也乃從外感治法隨用風藥得汗而解身涼神清瘡口復起仍前治法而痊若不審其故又不明破傷風治法則必無效惟有相視莫解而已

### 肺癰

蘇州錢君復庵歎血不止諸醫以血證治之病益劇余往診見其吐血滿地細審之中似有膿而腥臭者余曰此肺癰也膿已成矣金匱云膿成則死然有生者余遂多方治之錢亦始終相信一月而愈蓋余平日因此證甚多集唐人以來治肺癰之法用甘涼之藥以清其火滋潤之藥以養其血滑降之藥以祛其痰芳香之藥以通其氣更以珠黃之藥解其毒金石之藥填其空兼數法而行之屢試必效今治錢君亦兼此數法而痊強健逾舊幾二十年至乾隆三十年家業日隆因遷居大造途中相值邀余視其新居坐談良久辭出見其右額有豆大黑點問之錢對曰昨此處生一瘰頗癢無他苦也余諦審之曰此毒發於內治之失宜可以傷命非輕疾也錢笑而腹非之余曰本當為君竭力但君未信若一用藥而毒大發則反以為病由藥作故不敢但多年相好不可不盡言如五六月病勢增重當來相聞勿為人誤越五日遣人邀余山中住則見其額腫目閉哀號竟夕方悔信余之不早細視皮中有物乃三品一條槍也拔去五條嗟乎此乃腐爛死肌之惡藥好肉用上其痛應心况額上皮內即骨橫插皮中所以痛極余既不能久

留。又壞證難治。力辭歸山。易以他醫。面目俱腐而死。嗟乎。前何相信之深。後何不信之至。豈非命乎。

### 乳癖

東洞庭劉某夫人。患乳癖。醫者既不能消散。成功之後。又用刀向乳頭上寸餘。出毒瘡。口向上。膿反下注。乳囊皆腐。寒熱不食。將成乳癆。內外二科。聚議無定。群以為不治。與延余診之。曰。此非惡證。治不如法耳。尚可愈也。但須百日耳。其家戚族皆少年喜事。聞余言。欲塞群醫之口。向病家曰。我輩公懇先生留山中百日。必求收功。而後已。如欲歸家。備快舟以迎送。余初不允。繼勉承之。多方治之。至九十日。而未見功。蓋病者柔弱畏痛。既不敢於乳下別出一頭。而膿水從上注下。頗難出盡。故有傳囊之患。忽生一法。用藥袋一個。放乳頭之下。用帛束縛之。使膿不能下注。外以熱茶壺熨之。使藥氣乘熱入內。又服生肌託膿之丸。散於是膿從上泛厚而且多。七日而膿盡生肌。果百日而全愈。後以此法治他證。無不神效。可知醫之為術。全賴心思。轉變刻舟求劍。終無一驗也。

### 下疳

濮院沈維德。患下疳。前陰連根爛盡。溺從骨縫中出。滲灌腎囊中。哀號痛楚。肛門亦復爛深半寸。載至余家。止求得生為幸。余亦從未見此病。姑勉為治之。內服不過解毒養血之劑。而敷藥則每用必痛。屢易方。至不痛而後已。兩月後。結痂能行。惟陰莖僅留根耳。余偶閱秘本。有再長靈根一方。內用胎狗一個。適余家狗生三子。取其一。況裏煨燥。合藥付之。逾二年。忽生一子。舉族大譁。謂人道已無。焉能生子。蓋維德頗有家資。應繼者懷覬覦之心也。其岳徐君密詢之。沈曰。我服藥後。陽道已長。生子何疑。徐君乃集其族。人共驗之。陽道果全。但累生如有節。而無總皮。再期又生一子。眾始寂然。遠近傳之。以為奇事。今猶有述之。以為異聞者。



附再長靈根方三十日復生效

煨乳石

三錢五分琥珀七分

硃砂六分

人參一錢

真珠七分

牛黃四分

真水粉五分

胎狗一個

雄黃六分

用靈仙首烏大力子蓼草汁煮一晝夜炒如銀色石為末每服三釐日進四服臥又一服俱以土茯苓半觔陰陽水十二椀煎五椀連送五服七日驗

雄棠煮一晝夜而炒如銀色之藥品即上文煨乳石等九味也詳玩文義似宜移石字於用字之上方順第胎狗煨燥必黑全狗分兩又必數倍於

諸藥同煮同炒不知何以能如銀色是必煨時不令黑也

筋瘤

蘇州一小童背腫大如覆碗俯不能仰群謂駝疾也或戲余曰君能治奇疾若愈此則我輩服矣其父

母以余為果能治也亦力求焉余實不知其中何物姑以腐藥塗之數日皮開肉爛視其肉如蚯蚓者盤

結數條細審之乃背上之筋所聚也余頗悔輕舉急以舒筋收口丸散外敷內服筋漸散創漸平膚完而

身直矣此筋瘤之一種也聞傳以余為能治駝疾從此求治駝者雲集余俱謝不能此乃幸而偶中古人

並無此治法矣未入都尚有人詢及者余謝無此事而已存此以識異

雄按泗溪神於外科讀其所評外科正宗等書已見一斑是編列業僅十餘條然各大證治法略備洵癩疽家亦文錄字之書也可不

奉為圭臬哉

附刻許辛木農部札

惠書久不報闕然於懷承示醫書二種奉繳弟於此事茫然泗溪業僅枝出誤字數處即轉寄吳葆山舍

親葆山醫學與王君孟英在伯仲之間亦極贊此書手眼通靈即過錄一本奉為鴻寶又校正數字屬轉

達左右早付手民以廣其傳功德不細也內有脫簡弟意得原本補之大妙無則於章末旁註一闕字從

郭公夏五之例何如。覆將中堂書與醫案無異。似宜附刻。與秦司寇書則皆寒暄語。可刪耳。瘍科選擇批點確是徐氏手筆。足與所批正宗相輔而行。已過錄珍藏矣。

又

來書謂中多時俗口頭語。弟意名醫手筆。既未可輒改。又此等書取其活人而已。不當以詩文例繩之。正如藥物牛溲馬勃。止期有用。非若佳花美卉。有一殘缺。便須摘去也。原本不分卷。亦可仍之。葉多則當分葉。不滿百可無分也。

此書原本傳寫多誤。光燭與錢警石奉吉廣文許年木楮農部兩先生商權再四始行付梓茲摘錄農部札如右闕簡已從原本校補此外不敢增損一字以見光燭於此蓋慎之又慎云海昌蔣光燭附識

慎疾芻言

吳江徐靈胎洄溪著

補劑

學問之道必由淺入深從未有淺近不知而專求怪僻者况醫法一誤必至傷生害命尤不可不慎也夫所謂淺近者如傷風則防風荊芥感寒則蘇葉蔥頭欬則蘇子杏仁傷食則山楂神麩傷暑則香薷藟藿瘧疾則柴胡湯加減痢疾則黃芩湯加減婦人則四物湯加減小兒則異功散加減此皆歷聖相傳之定法千古不能易也至於危險疑難之證則非此等藥所能愈必博考群方深明經絡實指此病何名古人以何方主治而隨證加減今則以古聖之法為卑鄙不足道又不能指出病名惟以陽虛陰虛肝氣腎弱等套語概之專用溫補以欬外邪入裏馴至不救間有稍馴謹之人起病時仍用切近之藥一二劑未即有效即轉而改用溫補不思病之中人愈必有漸不可因無速效而即換方也況所服之方或未盡善不思即於前方損益萬妥而遽求變法又不肯先用輕淡之劑探測病情專取性雄力厚之品大反前轍必至害不旋踵總由胸無定見之故當思人之有病不外風寒暑濕燥火為外因喜怒憂思悲驚恐為內因此十三因試問何因是當補者大凡人非老死即病死其無病而虛死者千不得一况病去則虛者亦生病留則實者亦死若果元氣欲脫雖浸其身於參附之中亦何所用乃謬舉內經曰邪之所湊其氣必虛氣虛固當補矣所湊之邪不當去耶蓋邪氣補住則永不復出重則即死輕則遷延變病或有幸而愈者乃病輕而元氣漸復非藥之功也余少時見問疾者聞醫家已用補藥則相慶病者已愈今則病勢方張正厚然議進參附熟地豈不可駭其始也醫者先以虛脫嚇人而後以補藥媚人浙江則六味八味湯加人參麥冬等藥江南則理中湯加附桂熟地鹿茸等藥於是人人習聞以為我等不怕病死只怕虛死

所以服補而死猶恨補之不重。并自恨服人參無功。以致不救。醫者虛脫之言。真有先見之明。毫無疑悔。若服他藥而死。則親戚朋友。群詬病家之重財不重命。死者亦目不能瞑。醫者之罪。竟不勝誅矣。所以病人向醫者。述病必自謂極虛。而旁人代為述病。亦共指為極虛。惟恐醫者稍用攻削之劑。以致不起。或有稍識病之醫。即欲對證擬方。迫於此等危言。亦戰戰兢兢。擇至補之藥。以順其意。既可取容。更

### 用藥

醫道起於神農之著本草。以一藥治一病。但一病有數證。統名為病。如瘧痢之類。分明為症。如後之聖人。取藥之對證者。合幾味而成方。故治病必先有藥。而後有方。方成之後。再審其配合之法。與古何方相似。則云以某方加減。並非醫者先有一六味八味。理中等湯。橫於胸中。而硬派人服之也。至其辨證用藥之法。如有人風寒痰食。合而成病。必審其風居幾分。寒居幾分。痰食居幾分。而藥則隨其邪之多寡。以為增減。或一方不能兼治。則先治其最急者。所以無一味虛設之藥。無一分不斟酌之分兩也。况醫之為道。全在自考。如服我之藥。而病情不減。或反增重。則必深自痛懲。廣求必效之法。而後已。則學問自能日進。若不論何病。總以幾味溫補投之。愈則以為己功。死則以為病本不治。毫無轉訖。此則誤盡天下。而終身不自知也。又其所名陳方者。用柴胡一味。即名柴胡湯。用大黃一味。即名承氣湯。於古人制方之義。全然不知。隨其口之所指而已。其醫也。則襲幾句陰陽虛實。五行生剋。籠統套語。以為用溫補之地。而文人學士。又最易欺。見有陰陽五行等說。即以為有本之學。深信不疑。其人亦自詡為得醫學之捷徑。將千古聖人窮思極想。所製對證之方。數千首。皆不必問而已。稱名醫矣。夫醫者欲行其道。相習成風。猶無足怪。獨是間居涉獵之人。亦俱蹈襲此等謬說。與醫者同聲合氣。知親友有病。即往幫助。醫者用危言。等住本家使

之不得不用溫補貴重之藥以明闕切因而致死死則以為用此等藥原未嘗云病者服之必效不過如此門第之家於理不該服價賤之藥耳若己生疾又有人亦以此法覽之真屬可憫數十年前亦有涉獵醫學者頗能辨別藥性博覽經方今乃相率而入於魔道其始起於趙養葵張景岳輩全不知古聖製方之義私心自用者書成家彼亦不知流弊至於此極也我知天心仁愛其轉移必不久矣

### 中風

中風北人多屬寒宜散寒南人多屬火宜清火而祛風消痰則南北盡同古方自仲景侯氏黑散風引湯而外則續命湯為主方續命湯共有數首不外驅風其隨證加減皆有精義從未有純用溫熱滋補不效風寒痰火一毫外出以致重病必死輕病則使之不死不生惟日服人參以破其家而戀其命最可傷也又有稍變其說者用地黃引子以為得陰陽兼補之法亦大謬也此方乃治少陰氣厥不至古痞足痿名曰痲謚乃純虛無邪有似中風與風寒痰火之中風正相反劉河間之書可考也乃以此方治有邪之中風其害相等余每年見中風之證不下數十人遵古治法十愈八九服溫補之藥者百無一愈未甚服補藥者尚可挽回其不能全愈或真不治者不過十之一二耳奈何一患此證遂甘心永為廢人旁人亦視為必不起之證醫者亦惟令多服重價之藥使之直得一死而可無遺憾豈不怪哉願天下之中風者斷勿以可愈之身自投於必死之地也

### 效嗽

效嗽由於風寒入肺肺為嬌藏一味誤投即能受害若用熟地麥冬炙肉五味等滋膩酸斂之品補住外邪必至咯血失音喉癢肛癰喘急寒熱近者半年遠者三年無有不死蓋其服此等藥之日即其絕命之日也間有見幾而停藥者或能多延歲月我見以千計故今之吐血而成癆者大半皆因效嗽而誤服補

藥所致也。或云五味子乃仲景治嗽必用之藥。不知古方之用五味必合乾薑一散一收以治寒嗽之證。非治風火之嗽也。況加以熟地麥冬則受禍尤烈。又嗽藥中多用桔梗。桔梗升提。甘桔湯中用之以載甘草上行。治少陰之喉痛與治嗽宜清降之法。非宜服者。往往令人氣逆痰升。不得著枕。凡用藥當深知其性。而屢試屢驗。方可對病施治。無得冒昧也。

### 吐血

五十年前吐血者絕。今則年多一年。其證本皆可愈。而多不治者。藥誤之也。蓋血證因傷風欬嗽而起者。十之七八。因虛勞原缺而起者。十之一二。乃醫者概以熟地人參麥冬五味等滋補酸斂之藥。將風火痰瘀俱收拾肺管。令其欬嗽不止。元氣震動。津液化痰。不死何待。凡風寒補住。必成癆病。無人不知。今竟無一人知之矣。蓋吐血而嗽者。當清肺降氣。略進補陰之品。其不嗽者。乃喉中之絡破。故血從絡出。并不必服藥。其甚者。祇取補絡之藥。以填損處。自可除根。即不服藥。亦能自愈。歷試不爽。乃病者進以不服藥之說。則雖或面從背後。必非笑隨之進。以熟地麥冬人參五味等藥。則甘心就死。前者死矣。後者復然。豈非命乎。

### 中暑

暑字之名義與寒字相反。乃天行熱毒之病也。其證脈微少。氣煩渴燥熱。甚則手足反冷。若汗出不止。用人參白虎湯主之。如或身熱腹痛脹滿嘔吐瀉痢厥冷。則名熱霍亂。人參斷不可用。當用香薷飲。霍香正氣散主之。皆治暑之正法也。若傷寒論中。又有寒霍亂一證。此乃寒邪入陰。用理中湯主之。此治寒霍亂之法也。與暑熱之霍亂絕不相干。乃後之醫書於熱霍亂門中。附入寒霍亂一方。名大順散。用肉桂乾薑。即理中湯之變法。其方下亦註明治夏月傷冷飲之證。其說甚明。乃昏昧之人。耳聞有此方。竟以之治暑。

熱之霍亂以示奇異其死也宛轉呼號脣焦目裂七竅見血執歸於內則手足反冷而脈微欲絕所謂熱深厥亦深也手足冷謂之厥厥者逆也乃病者醫者不知此理以為服熱藥而更冷其為陰證無疑故目覩其慘死而無所悔以後復治他人熱藥更加重矣與治暑熱痢者之用四逆湯其害正同舉世盡以為必當如此雖言不信也

痢疾

痢有數種誤治則生死立判凡脾氣不實飲食不化晝夜無度無紅白積者此為脾瀉其方不當隨證施治若傷寒傳入陰經下利清穀脈微厥冷此為純陰之危證非參附乾薑不治患此者絕少若夫夏秋之月暑邪入腑膿血無度此名滯下全屬暑熱之毒蒸腸爛胃與陰寒之痢判若水火仲景以黃芩湯為主而因證加減此千古不易之法今乃以暑毒熱痢俱用附桂薑茸始則目赤舌焦號痛欲絕其色或變如豆汁或如敗肝熱深厥深手足逆冷不知其為熱厥反信為真寒益加薑附以至胃爛腸裂哀號宛轉如受炮烙之刑而死我見甚多惟有對之流涕更有用六味湯及參耆等補藥者於久痢虛乏之人或有倖中若邪氣未清非成痼疾即至不救蓋治痢之方甚多博考古書自能窮其變化何得以不入痢證之藥每投必誤也

陰證

六淫之邪不但暑燥火屬熱即風寒濕亦變為熱經云熱病者皆傷寒之類也又云人之傷於寒也則為病熱故外感總以散熱為治惟直中陰經之傷寒必現脈緊使青畏寒倦臥不喜飲舌無胎種種寒象當用溫散此千不得一者也何近日之醫舉天下寒熱雜感病勢稍重者皆指為陰證即用參附薑桂服後而熱更甚並不疑為熱藥之故即用熱地麥冬等以為補陰配陽之法竟忘其為外感矣要知陰證無發

慎疾芻言

熱之理間有寒極似陽而外現熱證者其內證必現種種寒象然亦當驅散其寒如麻黃附子細辛湯之類亦並無補寒之法也乃以溫熱之邪硬派作陰證而全用溫劑真千古之奇聞也又有以夢洩房勞之後而得外感者為陰證更屬笑談夫邪果入陰經即無房勞等事亦屬陰證如邪不入陰經則自有本證治法與陰何干若云外邪乘虛入腎則尤當急驅腎中之邪豈可留邪燉腎又有用熱藥之後其熱勢並增忽轉而改用大寒乃是以藥試病矣要知一病有一病之方豈無對病和平之藥乃始投之火即轉而投之水何也然其死也病家不咎熱藥之誤而咎寒藥之誤何也蓋人之死也必漸冷服熱藥而反冷則信以為非藥之故若服寒藥而冷則明明以藥死之冷矣故熱藥之殺人不覺而寒藥之殺人顯然所以醫者寧可用補用熱雖死而猶可免咎也

### 老人

能長年者必有獨盛之處陽獨盛者當補其陰陰獨盛者當益其陽然陰盛者十之一二陽盛者十之八九而陽之大盛者不獨當補陰并宜清火以保其陰故老人無不頭熱耳聾面赤便燥現種種陽證乃醫者為老人立方不論有病無病總以補陽為上熱盛生風必生類中等病是名疾也若偶有風寒痰濕等因尤當急逐其邪蓋老年氣血不甚流利豈堪補住其邪以與氣血為難故治老人之有外感者總與壯年一例或實見其有虛弱之處則用輕淡之品而量為補託若無病而調養則當審其陰陽之偏勝而損益使平蓋千年之木往往自焚陰盡火炎萬物盡然也故治老人者斷勿用辛熱之藥竭其陰氣助其亢陽使之面紅目赤氣塞痰壅脈洪膚燥當著艾之年而加以焚如之慘也

### 婦人

婦人懷孕中一點真陽日吸母血以養故陽日旺而陰日衰凡半產滑胎皆火盛陰衰不能全其形體



故也。近人有胎前宜涼之說，頗為近理。至於產後，則陰血盡，脫孤陽獨立，臟腑如焚，經脈如沸，故仲景專以養血消瘀為主。而石膏竹茹亦不禁用。余每遵之，無不立效。及近人造為產後宜溫之邪說，以薑桂為主藥。夫果陰陽俱脫，脈遲畏寒，血水淋漓，面青舌白，薑桂亦有用時。乃血乾火燥，純現執證，亦用執藥，則經枯脈絕，頃刻而斃。我見以百計，更有惡露未淨，身熱氣塞，煩躁不寐，心煩腹痛，皆由敗血為患，亦用薑桂助其火而堅其瘀，重則即死，輕則變成褥勞。世之所謂女科名家，一例如此。蓋胎產乃天地生育之機，絕少死證，其死皆藥誤也。造為此等邪說者，九死不足以蔽其辜。

### 小兒

小兒之疾，熱與痰二端而已。蓋純陽之體，日抱懷中，衣服加煖，又襁褓之類，皆用火烘，內外俱熱，熱則生風，風火相煽，乳食不歇，則必生痰。痰得火燥，則堅如膠漆，而乳仍不斷，則新舊之痰日積，必至脹悶啼哭。又強之食乳，以止其啼，從此胸高氣塞，目瞪手搖，即指為驚風，其實非驚，乃飽脹欲死耳。此時告其父母，令減衣停乳，則必大溫，謂虛羸若此，反令其凍餒，無不唾罵。醫者亦不明此理，非用剛燥之藥，即用參耆滋補，至痰結氣凝之後，則無可救療。余見極多，教之適其寒溫，俾其乳食，以清米飲養其胃氣，稍用消痰順氣之藥調之，能聽從者，十愈八九。其有不明此理，反目為狂言者，百無一生。至於痘科，尤屬怪誕。痘為小兒之所必不免，非惡疾也。當天氣溫和之時，死者絕少。若大寒大暑，其元氣虛而稠密者，間有不治。其始欲透發，其後欲漿滿，皆賴精血為之，乃未發以前，即用大黃石膏數兩，以遏其生發之機，而敗其元氣。既而即用蚯蚓數十，蟻螞數個，及一切大寒大毒之品，如蜈蚣蝎子雞頭豬尾之類，又將地丁銀花等粗糲之品數兩煎汁而灌之，增其毒而倒其胃。此等惡物，即今醫者自服之，不必胃絕脹裂而死。况孩提乎？凡用此等藥者，必豫決此兒死於何日，十不失一。其父母翻感稱其眼力不爽，孰知其即死於彼所用之

藥也。或有元氣充實，幸而不死者，遂以為非此等大藥，不能挽回，而人人傳布，奉為神方矣。更可異者，強壯之年，醫者黃芩、麥芽，俱不敢用，以為剋伐。孩提之子，則石膏、大黃，成兩成片，毫不顧慮，忍心害理，至此而極。無奈呼天搶地，以告人，而人亦不信也。又有造為螳螂子之說者，割開頤肉，取出血痰，此法起於明末海濱，妖婦騙財之法，惟蘇松二處盛行。割死者甚眾，蓋小兒有痰火者，吃乳數日，必有一二日頤腫，厭食名曰妬乳，用薄荷、朴硝為末，搽一二次，即愈。即不治，亦愈。至所割出之痰塊，或大或小，人因信之，不知頤內空虛之處，人人有此，割則復生，并非病也。不然，何以普天下之小兒，從未有患螳螂子而死者。獨蘇松有此病耶？此亦一害，故并及之。

外科

治外科始起，欲其不大，將成欲其不痛，大則傷肌爛膚，腐骨穿筋，難於收口，痛則衝心，把胃，耗血亡津，惡證叢生矣。故始起之時，最重圍藥，束其根盤，截其餘毒，則頂自高，而膿易成，繼則護心託毒，治其內，化腐提膿，治其外，自然轉危為安。乃始則不能束毒使小，又無護心定痛之方，惟外用五灰三品，內服附桂熱毒等藥，必至腐腸爛肉，更輕用刀，鍼割肉斷筋，以致呼號，驚神散魂，飛冤轉求死，仁人之所不忍見也。况癰疽用刀太早，最難生肌收口。凡毒藥刀鍼，只宜施於頑肉老皮，餘者自有提頭呼膿之法。至於惡肉自有消腐化水之方，故能使患者絕無痛苦，收功速而精神易復。乃此等良法，一切不問，豈傳授之不真，抑或別有他念也？更可駭者，瘡瘍之證，最重忌口，一切鮮毒，毫不可犯，無書不載，乃近人反令病者專服毒物，以為以毒攻毒，夫解毒尚恐無效，豈可反增其毒？種種謬誤，不可殫述。間有患外證之人，若用安穩治法，全不以為妙，用毒藥刀鍼者，血肉淋漓，痛死復活，反以為手段高強，佩服深摯，而徧處薦引，因知疾痛生死，皆有定數，非人所能自主，而醫者與病人以苦楚亦病者有以召之也。

治法

凡病祇服煎藥而愈者惟外感之證為然其餘諸證則必用丸散膏丹針灸砭鏹浸洗熨搨蒸提按摩等法因病施治乃今之醫者既乏資本又惜工夫古方不考手法無傳寓一通治煎方其技已畢而病家不辭遠涉不惜重聘亦祇求得一煎方已大滿其願古昔聖人窮思極想製造治病諸法全不一問如此而欲愈大證痼疾無是理也所以今人患輕淺之病猶有服煎藥而愈者若久病大證不過遷延歲月必無愈理也故為醫者必廣求治法以應病者之求至常用之藥一時不能即合者亦當豫為修製以待急用所謂工欲善其事必先利其器奈何欲施救人之術而全無救人之具也

劑劑

古時權量甚輕古一兩今二錢零古一升今二合古一劑今之三服又古之醫者皆自採鮮藥如生地半夏之類其重比乾者數倍故古方雖重其實無過今之一兩左右者惟千金外臺間有重劑此乃治強實大證亦不輕用也若宋元以來每總製一劑方下必註云每服或三錢或五錢亦無過一兩外者此前劑之法也未藥則用一錢匕丸藥則如桐子大者十九粒加至二三十粒試將古方細細考之有如今日二兩至七八兩之煎劑乎皆由醫者不明古制以為權量與今無異又自疑為太重為之說曰今人氣薄富略為減輕不知已重於古方數倍矣所以藥價日貴而受言愈速也又有方中熟地用三四兩餘藥只用一二錢者亦從無此輕重懸殊之法要知藥氣入胃不過借此調和氣血非藥入口即變為氣血所以不在多也又有病人粒米不入反用膩隔酸苦腥臭之藥大棗濃煎灌之即使中病尚難運化况與病相反之藥填塞胃中即不藥死亦必灌死小兒尤甚又不論人之貧富人參總為不桃之品人情無不貪生必竭蹶措處孰知反以此而喪身其貧者送終無具妻子飄零是殺其身而并破其家也吾少時見前輩老

醫必審貧富而後用藥尤見居心長厚况是時參儻猶賤於今日二十倍尚如此謹慎即此等存心令人已不逮昔人遠矣

### 煎藥服藥法

煎藥之法各殊有先煎主藥一味後入餘藥者有先煎眾味後煎一味者有用一味煎湯以前藥者有先分煎後併煎者有宜多煎者補藥有宜少煎者散藥有宜水多者有宜水少者有不煎而泡漬者有煎而露一宿者有宜用猛火者有宜用緩火者各有妙義不可移易今則不論何藥准知猛火多煎將芳香之氣散盡僅存濃厚之質如煎燒酒者將糟久煮則酒氣全無矣豈能和榮達衛乎須將古人所定煎法細細推究而各當其宜則取效尤捷其服藥亦有益古方一劑必分三服一日服三次并有日服三次夜服三次者蓋藥味入口即行於經絡驅邪養正性過即已豈容間斷今人則每日服一次病久藥暫此一暴十寒之道也又有寒熱不得其宜早暮不合其時或與飲食相雜或服藥時即勞動胃弱不惟無益反能有害至於傷寒及外證痘證病勢一日屢變今早用一劑明晚更用一劑中間隔兩晝一夜經絡已傳病勢益增矣又發散之劑必煖覆令汗出使邪從汗散若不使出汗則外邪豈能內消此皆淺易之理醫家病家皆所宜知也又惡毒之藥不宜輕用昔神農遍嘗諸藥而成本草故能深知其性今之醫者於非常用之藥亦宜細辨其氣味方不至於誤用若耳聞有此藥並未一嘗又不細審古人用法而輒以大劑灌之病者服之苦楚萬狀并有因而死者而已亦茫然不知其何故若能每味親嘗斷不敢冒昧試人矣此亦不可不知也

### 延醫

疾病為生死相關一或有誤追悔無及故延醫治病乃以性命相託也何可不加意慎擇如無的確可信

之人。寧可不服藥以待命。乃世人獨忽於此。惟以耳為目。不考其實。學何如。治效何若。聞人稱說。即延請施治。服藥無效。毫不轉念。甚而日重一日。惟咎己病之難痊。不咎醫者之貽誤。孰知藥果中病。即不能速愈。必無不見效之理。不但服後奏功。當服時已有可徵者。如熱病服涼藥。寒病服熱藥之類。聞其氣已馨。香可愛。入於口。即和順安適。如不中病之藥。則聞其氣必厭惡。入於腸。必懊惱。內經云。臨病人問所便。此真訣也。令人則信任一人。即至死不悔。其故莫解。想必冥冥之中。有定數也。又有與此相反者。偶聽人言。即求一試。藥未盡劑。又易一醫。或一日而請數人。各自立說。茫無主張。此時即有高明之人。豈能違眾力。爭以遭謗。忌亦惟隨人。唯諾而已。要知病之傳變。各有定期。方之更換。各有次第。藥石亂投。終歸不治。二者事異而害同。惟能不務虛名。專求實效。審察精詳。見幾明決。庶幾不以性命為兒戲矣。

秘方

古聖設立方藥。專以治病。凡中病而效者。即為秘方。並無別有奇藥也。若無病而服藥。久則必有偏勝之害。或有氣血衰弱。藉藥滋補。亦必擇和平純粹之品。審體氣之所偏。而稍為資助。如世所為秘方奇術。大熱大補之劑。乃昔人所造。以欺人者。若其方偶與其人相合。或有小效。終歸大害。其不相合者。無不傷生。更有一等怪方。乃富貴人賄醫所造者。余曾遇一貴公子。向余求長生方。余應之曰。公試覓一長生之人。示我。我乃能造長生之方。若長生者無一人。則天下無長生之方矣。其人有溫色。是時適有老醫在其家。因復向老醫求得之。乃傲余曰。長生方。某先生已與我矣。公何獨吝也。余視其方。乃聚天下血肉溫補之藥。故難其製法。使耳目一新者。余私謂老醫曰。先生之長生方。從何傳授。老醫曰。子無見哂。子非八世行道之人耳。凡富貴之人。何求不得。惟懼不能長生。縱慾耳。故每遇名醫。必求此方。若長生方。不知何以得行其道。我非有意欺彼。其如欲應酬於世。自不得不然耳。後果得厚酬。余因知天下所傳秘方。皆此類也。

此即文成五利之餘術萬勿以為真可長生也速死則有之耳識此以醒世之求長生而覓秘方者

詭誕

醫藥為人命所關較他事尤宜敬慎今乃炫奇立異竟視為兒戲矣其創始之人不過欲駭愚人之耳目繼而互相效尤竟以為行道之捷徑而病家則以為名醫異人之處在此將古人精思妙法反全然不考其弊何所底止今略舉數端於左

人中黃腸胃熱毒偶有舉入丸散者今人中白飛淨入末藥若煎服鹿茸麋茸俱入丸藥外症痘症偶

寒久期今人以治熱河車齊帶補腎凡藥偶用今煎劑腥穢不堪又辛大寒傷胃前人有方以治血

毒時痢腐腸而死小兒丘疔痘證用一二條酒沖已屬不典今吳公齊魯即桑蝎子胡蜂皆極毒之物用者多石決

明眼科磨光鹽水煮入末藥今白累殼此收濕滲藥亦入雞子黃此少陰不寐引經燕窠海參淡菜鹿筋

丹筋魚肚鹿尾皆食品不入藥劑必須洗淨加以薑椒蔥酒醋炒半夏醋煨赭石麻油炒半夏陽胎

啞而死橘白橘內筋荷葉邊杞杷核杏核扁豆殼皆方書所棄今醋炒半夏醋煨赭石麻油炒半夏陽胎

此類不可枚舉以上各種其性之和平者服之雖無大害亦有小損至諸不常用及腥毒之物病家皆不

能炮製必至臭穢惡劣試使立方之人取而自嘗之亦必伸舌攢眉嘔吐噦逆入腹之後必至脹痛腎亂

求死不得然後深悔從前服我藥之人不知如何能耐此苦楚恨嘗之不早枉令人受此荼毒也抑思人

之求治不過欲全其命耳若以從未經驗之方任意試之服後又不考其人之生死而屢用之則終身無

改悔之日矣嗟乎死者已矣孰知其父母妻子之悲號慘戚有令人不忍見者乎念及此能不讀書考古

以求萬德萬全之法者非人情也以上所指皆近時之弊若後世此風漸改必不信世間有如此醫法反

以我言為太過者豈知並無一語虛妄者乎又有疑我為專用寒涼攻伐者不知此乃為誤用溫補者戒

非謂溫補概不可用也。願世之為醫者，真誠敬慎，勿用非法之方。世之求治者，明察知幾，勿服怪誕之藥，則兩得之矣。

宗傳

一切道術必有本源，未有目不睹漢唐以前之書，徒記時尚之藥數種而可為醫者。今將學醫必讀之書，并讀法開列於左。果能專心體察，則胸有定見，然後將後世之書，徧觀博覽，自能辨其是非，取其長而去其短矣。

靈樞經 此明經絡藏府之所以生成疾病之所由侵犯針灸家不可不詳考。方脉家略明大義可也。

素問 此明受病之源及治病之法，千變萬化無能出其範圍。如不能全讀，擇其精要切實者，熟記可也。

傷寒論 此一切外感之總訣，非獨治傷寒也。明於此，則六淫之病無不通貫矣。

金匱 此一切雜病之祖方。其諸大證已無不備，能通其理，天下無難治之病矣。

神農本草 神農本草經止三百六十種，自陶宏景以後，藥味日增，用法益廣。至明李時珍綱目而大備。

其書以本經為主，而以諸家之說附之。讀者字字考驗，則能知古人製方之妙義，而用之不窮矣。

外臺祕要

千金方 二書匯集唐以前之經方祕方，及婦科兒科外科，無所不備，博大深微，必明乎靈素仲景之書。

方能知所審擇，不至泛濫而無所適從矣。

婦科

兒科 婦人除經帶胎產之外，與男子同。小兒除驚癇痧痘而外，與老壯同。所以古人並無專科，後人不

能通貫醫理，只習經產驚痘等方藥，乃有專科。若讀前所列之書，則已無所不能，更取後世所著婦


人良方。幼幼新書等。參觀可也。

外科 其方亦具千金外臺。後世方愈多而法愈備。如寶氏全書。瘍科選擇。俱可採取。惟惡毒之藥。及輕用刀鍼。斷宜切戒。

御纂醫宗金鑑 源本靈素。推崇傷寒論。金匱要略。以為宗旨。後乃博採眾論。嚴其去取。不尚新奇。全無偏執。又無科不備。真能闡明聖學。垂訓後人。足徵

聖朝仁民之術。無所不周。習醫者。即不能全讀古書。祇研究此書。足以名世。何乃不此崇信。而反從事於近世杜撰無稽之說也。





H87378A

1907

V. 10